



白氏文集卷第十二

感傷四

詞行曲引雜體
凡二十九首

短詞行

曠曠太陽如火色
上行千里下一刻
出為白晝入為夜
圓轉如珠住不得
住不得無奈何
為君舉酒詞短
詞歌聲苦詞亦苦
四座少年君聽取
今夕未竟明夕催
秋風纔往春風回
人無根蒂時不駐
朱顏白日相墮
顏勸君且強笑
一面勸君復強飲
一盃人生不得
長歡樂年少須臾
老到來

生離別

食檠不易食梅難
檠能苦兮梅能酸
未如生別之為難
苦在心兮酸在肝
晨鷄再鳴殘月沒
征馬連嘶行

入出回看骨肉哭一聲梅酸槩苦甘如蜜黃河水白
黃雲秋行人河邊相對愁天寒野曠何處宿棠梨葉
戰風颼颼生離別生離別憂從中來無斷絕憂極心
勞血氣衰末年三十生白髮

浩訶行

天長地久無終畢昨夜今朝又明日鬢髮蒼浪牙齒
踈不覺身年四十七前去五十有幾年把鏡照面心
茫然既無長繩繫白日又無大藥駐朱顏朱顏日漸
不如故青史功名在何處欲留年少待富貴富貴不
來年少去去復去如長河東流赴海無迴波賢愚
貴賤同歸盡北邙塚墓高嵯峨古來如此非獨我未
死有酒且高歌顏回短命伯夷餓我今所得亦已多
功名富貴須待命命若不來知奈何

王夫子

王夫子送君爲一尉東南三千里道途雖遠位
雖卑月俸猶堪活妻子男兒口讀古人書束帶歛手
來從事近將狗祿給一家遠則行道佐時理行道佐
時須待命委身下位無爲耻命苟未來且求食官無
卑高及遠邇男兒上既未能濟天下下又不至飢寒
死吾觀九品至一品其間氣味都相似紫綬朱綬青
布衫顏色不同而已矣王夫子別有一事欲勸君逢
酒逢春且歡喜

江南遇天寶樂叟

白頭老叟泣且言祿山未亂入梨園能彈琵琶和法

曲多在華清隨至尊是時天下太平久年年十月坐
朝元千官起居環珮合萬國會同車馬奔金鈿照耀
石甕寺蘭麝熏煮溫湯源貴妃宛轉侍君側體弱不
勝珠翠繁冬雪飄颻錦袍暖春風蕩漾霓裳翻歡娛
未足燕寇至弓勁馬肥胡語喧幽土人遷避夷狄鼎
湖龍去哭軒轅從此漂淪到南土萬人死盡一身存
秋風江上浪無限暮雨舟中酒一樽涸魚久失風波
勢枯草曾沾雨露恩我自秦來君莫問驪山渭水如
荒村新豐樹老籠明月長生殿閤鎖春雲紅葉紛紛
蓋歆瓦綠苔重重封壞垣唯有中官作宮使每年寒
食一開門

送張山人歸嵩陽

黃昏慘慘天微雪脩行坊西鼓聲絕張生馬瘦衣且
單夜扣柴門與我別媿君冒寒來別我為君沽酒張
燈火酒酣火煖與君言何事出關又入關荅云前年
偶下山四十餘月客長安長安古來名利地空手無
金行路難朝遊九城陌肥馬輕車欺殺客暮宿五侯
門殘茶冷酒愁殺人春明門門前便是嵩山路幸有
雲泉容此身明日辭君且歸去

醉後走筆酬劉五主簿長句之贈兼簡張太

賈二十四先輩昆季

劉兄文高行孤立十五年前名翕習是時相遇在符
離我年二十君三十得意忘年心迹親寓居同縣日
知聞衡門寂寞朝尋我古寺蕭條暮訪君朝來暮去

多携手窮巷貧居何所有秋燈夜寫聯句詩春雪朝
傾煖寒酒俾湖綠愛白鷗飛濉水清憐紅鯉肥偶語
閒攀芳樹立相扶醉踏落花歸張賈弟兄同里巷乘
閒數數來相訪雨天連宿草堂中月夜徐行石橋上
我年漸長忽自驚鏡中冉冉髭鬚生心畏後時同勵
志身牽前事各求名問我棲棲何所適鄉人薦爲鹿
鳴客二千里外謝交游三十韻詩慰行役出門可憐
唯一身弊裘瘦馬入咸秦藪藪街鼓紅塵闇晚到長
安無主人二賈二張與余弟驅車邈迤來相繼操詞
握賦爲干戈鋒銳森然勝氣多同入文場多苦戰五
人十載九登科二張得雋名居甲美退爭雄重告捷
棠棣輝榮並桂枝芝蘭芬馥和荆葉唯有沅犀屈未
伸握中自謂駭雞珍三年不鳴鳴必大豈獨駭鷄當
駭人元和運氣千年聖同遇明時余最幸始辟秘閣
吏王畿遽列諫垣升禁闈蹇步何堪鳴珮玉衰容不
稱著朝衣閭闔晨開朝百辟冕旒不動香烟碧步登
龍尾上虛空立去天顏無咫尺宮花似雪從乘輿禁
月如霜坐直廬身賤每驚隨內宴才微常愧草天書
晚松寒竹新昌第職居密近門多閉日暮銀臺下直
回故人到門門暫開回頭下馬一相顧塵土滿衣何
處來歛手炎涼叙未畢先說舊山今悔出岐陽旅宦
少歡娛江左遷游費時日贈我一篇行路吟吟之句
句披沙金歲月徒催白髮貌泥塗不屈青雲心誰謂
茫茫天地意短才獲用長才棄我隨鷓鴣入煙雲謬

上丹墀爲近臣君同鸞鳳棲荆棘猶著青袍作選人
惆悵知賢不能薦徒爲出入蓬萊殿月慙諫紙二百
張歲愧俸錢三十萬大底浮榮何足道幾度相逢即
身老且傾斗酒慰羈愁重話符離問舊遊北巷鄰居
幾家去東林舊院何人住武里村花落復開流溝山
色應如故感此酬君千字詩醉中分手又何之須知
通塞尋常事莫歎浮沉先後時慷慨臨岐重相勉殷
勤別後加飡飯君不見買臣衣錦還故鄉五十身榮
未爲晚

和錢貞外荅盧貞外早春獨遊曲江見寄長

句

春來有色閨融融先到詩情酒思中柳岸霏微裏

雨杏園淡蕩開花風聞君獨遊心鬱鬱薄晚新晴騎
馬出醉思詩侶有同年春歎翰林無暇日雲夫首倡
寒玉音蔚章繼和春搜吟此時我亦閉門坐一日風
光三處心雲夫蔚章同年及第時
予與蔚章同在翰林

東墟晚歇時退居
渭村

涼風冷露蕭索天黃蒿紫菊荒涼田遠塚秋花少顏
色細蟲小蝶飛翻翻中有騰騰獨行者手拄漁竿不
騎馬晚從南澗釣魚回歇此墟中白楊下褐衣半故
白髮新人逢知我是何人誰言渭浦棲遲客曾作甘
泉侍從臣

客中月

客從江南來來時月上弦悠悠行旅中三見清光圓

曉隨殘月行夕與新月宿誰謂月無情千里遠相逐
朝發渭水橋暮入長安陌不知今夜月又作誰家客

挽歌詞

丹旄何飛揚素驂亦悲鳴晨光照閭巷輻車儼欲行
蕭條九月夫哀挽出重城借問送者誰妻子與弟兄
蒼蒼上古原峨峨開新塋含酸一慟哭異口同哀聲
舊壠轉蕪絕新墳日羅列春風草綠北邙山此地年
年生死別

長相思

九月西風興月冷霜華凝思君秋夜長一夜魂九升
二月東風來草折花心開思君春日遲一日腸九迴
妾住洛橋北君住洛橋南十五即相識今年二十三

有如女蘿草生在松之側蔓短枝苦高縈迴上不得
人言人有願願至天必成願作遠方獸步步比肩行
願作深山木枝枝連理生

山鷓鴣

山鷓鴣朝朝暮暮啼復啼啼時露白風淒淒黃茅崗
頭秋日晚苦竹嶺下寒月低畬田有粟何不啄石楠
有枝何不棲迢迢不緩復不急樓上舟中聲閣入夢
鄉遷客展轉臥抱兒寡婦彷徨立山鷓鴣爾本此鄉
鳥生不辭巢不別羣何苦聲聲啼到曉啼到曉唯能
愁北人南人慣聞如不聞

放旅鴈

元和十年冬作

九江十年冬大雪江水生冰樹枝折百鳥無食東西

飛中有旅鴈聲最飢雪中啄草冰上宿翅冷騰空飛
動遲江童持網捕將去手携入市生賣之我本北人
今譴謫人鳥雖殊同是客見此客鳥傷客人贖汝放
汝飛入雲鴈鴈汝飛向何處第一莫飛西北去淮西
有賊討未平百萬甲兵久屯聚官軍賊軍相守老食
盡兵窮將及汝健兒飢餓射汝喫拔汝翅翎爲箭羽

送春歸

元和十一年三月三十日作

送春歸三月盡日日暮時去年杏園花飛御溝綠何
處送春曲江曲今年杜鵑花落子規啼送春何處西
江西帝城送春猶怏怏天涯送春能不加惆悵莫惆
悵送春人冗負無替五年罷應須準擬再送潯陽春
五年炎涼凡十變安知此身健不健好送今年江上

春明年未死還相見

山石榴寄元九

山石榴一名山躑躅一名杜鵑花杜鵑啼時花撲撲
九江三月杜鵑來一聲催得一枝開江城上佐闌無
事山下斫得廳前栽爛熳一欄十八樹根株有數花
無數千房萬葉一時新嫩紫殷紅鮮麴塵淚痕裊損
擘脂臉剪刀裁破紅綃巾謫仙初墮愁在世姹女新
嫁嬌泥去聲春日射血珠將滴地風翻焰火欲燒人間
折兩枝持在手細看不似人闌有花中此物是西施
芙蓉芍藥皆嫫母竒芳絕艷別者誰通州遷客元拾
遺拾遺初貶江陵去去時正值青春暮商山秦嶺愁
殺人山石榴花紅夾路題詩報我何所云苦云色似

石榴裙當時叢畔唯思我今日欄前只憶君憶君不見坐銷落日西風起紅紛紛

畫竹

并序

協律郎蕭悅善畫竹舉時無倫蕭亦甚自秘重存終歲求其一竿一枝而不得者知予天與好事忽寫一十五竿惠然見投予厚其意高其藝無以答貺作歌以報之凡一百八十六字云

植物之中竹難寫古今雖畫無似者蕭郎下筆獨逼真丹青以來唯一人人畫竹身肥擁腫蕭畫莖瘦節節竦人畫竹梢死羸垂蕭畫枝活葉葉動不根而生從意生不笋而成由筆成野塘水邊碕岸側森森兩叢十五莖嬋娟不失筠粉態蕭颯盡得風煙情舉頭忽看不似畫低耳靜聽疑有聲西叢七莖勁而健省向天竺寺前石上見東叢八莖踈且寒曾憶湘妃廟裏雨中看幽姿遠思少人別與君相顧空長歎蕭郎蕭郎老可惜手顫眼昏頭雪色自言便是絕筆時從今此竹猶難得

真娘墓

墓在虎丘寺

真娘墓虎丘道不識真娘鏡中面唯見真娘墓頭草霜摧桃李風折蓮真娘死時猶少年脂膚美手不牢固世間有物難留連難留連易消歇塞北花江南雪

長恨歌傳

前進士陳鴻撰

開元中泰階平四海無事玄宗在位歲久倦于旰食宵衣政無小大始委于右丞相深居遊宴以聲色自

娛先是元獻皇后武淑妃皆有寵相次即世宮中雖良家子千數無可悅目者上心忽忽不樂時每歲十月駕幸華清宮內外命婦媚耀景從浴日餘波賜以湯沐春風靈液淡蕩其間上心油然若有顧遇左右前後粉色如土詔高力士潛搜外宮得弘農楊玄琰女子于壽邸既笄矣鬢髮膩理纖穠中度舉止閑冶如漢武帝李夫人別疏湯泉詔賜澡瑩既出水體弱力微若不任羅綺光彩煥發轉動照人上甚悅進見之日奏霓裳羽衣曲以導之定情之日授金釵鈿合以固之又命戴步搖垂金璫明年冊爲貴妃半后服用繇是治其容敏其詞婉變萬態以中上意上益嬖焉時省風九州泥金五岳驪山雪夜上陽春朝與上行

同室宴專席寢專房雖有三夫人九嬪二十七世婦八十一御妻暨後宮才人樂府妓女使天子無顧眄意自是六宮無復進幸者非徒殊艷尤態致是蓋才智明慧善巧便佞先意希旨有不可形容者叔父昆弟皆列在清貴爵爲通侯姊妹封國夫人富埒王室車服邸第與大長公主侔而恩澤勢力則又過之出入禁門不問京師長吏爲側目故當時謠詠有云生女勿悲酸生男勿喜歡又曰男不封侯女作妃看女却爲門上楣其人心羨慕如此天寶末兄國忠盜丞相位愚弄國柄及安祿山引兵向闕以討楊氏爲辭潼關不守翠華南幸出咸陽道次馬嵬亭六軍徘徊持戟不進從官郎吏伏上馬前請誅以謝天下國忠

奉麓纓盤水死於道周左右之意未快上問之當時
敢言者請以貴妃塞天下怒上知不免而不忍見其
死反袂掩面使牽之而去蒼黃展轉竟就絕於尺組
之下既而玄宗狩成都肅宗受禪靈武明年大兇歸
元大駕還都尊玄宗爲太上皇就養南宮遷于西內
時移事去樂盡悲來每至春之日冬之夜池蓮夏開
宮槐秋落梨園弟子玉琯發音聞霓裳羽衣一聲則
天顏不怡左右歔歔三載一意其念不衰求之寃夢
杳不能得適有道士自蜀來知上意心念楊妃如是
自言有李少君之術玄宗大喜命致其神方士乃竭
其術以索之不至又能遊神馭氣出天界沒地府以
求之不見又勞求四虛上下東極天海跨蓬壺見最

高山山上多樓闕西廂下有洞戶東向闔其門署曰
玉妃太真院方士抽簪扣扉有雙童女出應問方士
造次未及言而雙鬟復入俄有碧衣侍女又至詰其
所從方士因稱唐天子使者且致其命碧衣云玉妃
方寢請少待之于時雲海沉沉洞天日曉瓊戶重闔
悄然無聲方士屏息斂足拱手門下久之而碧衣延
入且曰玉妃出見一人冠金蓮披紫綃珮紅玉曳鳳
馬左右侍者七八人揖方士問皇帝安否次問天寶
十四年已還事言訖憫然指碧衣取金釵鈿合各拈
其半授使者曰爲謝太上皇謹獻是物尋舊好也方
士受辭與信將行色有不足玉妃固徵其意復前跪
致詞請當時一事不爲他人聞者驗於太上皇不然

恐鈿合金釵負新垣平之詐也玉妃茫然退立若有
所思徐而言之曰昔天寶十載侍駕避暑驪山宮秋
七月牽牛織女相見之夕秦人風俗是夜張錦綉陳
飲食瓜果焚香于庭號爲乞巧宮掖間猶尚之夜始
半休侍衛於東西廂獨侍上上凭肩而立因仰天感
牛女事密相誓心願世世爲夫婦言畢執手各嗚咽
此獨君王知之耳因自悲曰由此一念又不得居此
復墮下界且結後緣或爲天或爲人決再相見好合
如舊因言太上皇亦不久人世幸唯自安無自苦耳
使者還奏太上皇皇心震悼日日不豫其年夏四月
南宮晏駕元和元年冬十二月太原白樂天自校書
郎尉于盤屋鴻與琅邪王質夫家于是邑暇日相携
遊仙遊寺話及此事相與感歎質夫舉酒于樂天前
曰夫希代之事非遇出世之才潤色之則與時消沒
不聞于世樂天深於詩多於情者也試爲歌之如何
樂天因爲長恨歌意者不但感其事亦欲徵尤物室
亂階垂于將來也歌旣成使鴻傳焉世所不聞者予
非開元遺民不得知世所知者有玄宗本紀在今但
傳長恨歌云爾

漢皇重色思傾國御宇多年求不得楊家有女初長
成養在深閨人未識天生麗質難自棄一朝選在君
王側回頭一笑百媚生六宮粉黛無顏色春寒賜浴
華清池溫泉水滑洗凝脂侍兒扶起嬌無力始是新
承恩澤時雲鬢花顏金步搖芙蓉帳暖度春宵春宵

苦短日高起從此君王不早朝承歡侍宴無間暇春
從春遊夜專夜後宮佳麗三千人三千寵愛在一身
金屋粧成嬌侍夜玉樓宴罷醉和春姊妹弟兄皆列
土可憐光彩生門戶遂令天下父母心不重生男重
生女驪宮高處入青雲仙樂風飄處處聞緩歌謾舞
疑絲竹盡日君王看不足漁陽鞞鼓動地來驚破霓
裳羽衣曲九重城闕煙塵生千乘萬騎西南行翠華
搖搖行復止西出都門百餘里六軍不發無奈何宛
轉蛾眉馬前死花鈿委地無人收翠翹金雀玉搔頭
君王掩面救不得回首血淚相和流黃埃散漫風蕭
索雲棧縈紆登劔閣峨眉山下少人行旌旗無光日
色薄蜀江水碧蜀山青聖主朝朝暮暮情行宮見月

傷心色夜雨聞鈴腸斷聲天旋地轉迴龍馭到此躊
躇不能去馬嵬坡下泥土中不見玉顏空死處君臣
相顧盡沾衣東望都門信馬歸歸來池苑皆依舊太
液芙蓉未央柳芙蓉如面柳如眉對此如何不淚垂
春風桃李花開夜秋雨梧桐葉落時西宮南苑多秋
草宮葉滿階紅不掃梨園弟子白髮新椒房阿監青
娥老夕殿螢飛思悄然孤燈挑盡未成眠遲遲鐘鼓
初長夜耿耿星河欲曙天鴛鴦瓦冷霜華重翡翠衾
寒誰與共悠悠生死別經年魂魄不曾來入夢臨邛
道士鴻都客能以精誠致魂魄爲感君王展轉思遂
教方士殷勤覓排空馭氣奔如電升天入地求之遍
上窮碧落下黃泉兩處茫茫皆不見忽聞海上有仙

山山在虛無縹緲間樓閣玲瓏五雲起其中綽約多
仙子中有一人字太真雪膚花貌參差是金闕西廂
叩玉肩轉教小玉報雙成聞道漢家天子使九華帳
裡夢魂驚攬衣推枕起徘徊珠箔銀屏遷迤開雲鬢
半偏新睡覺花冠不整下堂來風吹仙袂飄飄舉猶
似霓裳羽衣舞玉容寂寞淚闌干梨花一枝春帶雨
含情凝涕謝君王一別音容兩渺茫昭陽殿裡恩愛
絕蓬萊宮中日月長回頭下望人寰處不見長安見
塵霧唯將舊物表深情鈿合金釵寄將去釵留一股
合一扇釵擘黃金合分鈿但令心似金鈿堅天上人
間會相見臨別殷勤重寄詞詞中有誓兩心知七月
七日長生殿夜半無人私語時在天願作比翼鳥在
地願爲連理枝天長地久有時盡此恨綿綿無絕期

婦人苦

蟬鬢加意梳蛾眉用心掃幾度曉粧成君看不言好
妾身重同穴君意輕借老惆悵去年來心知未能道
今朝一開口語少意何深願引他時事移君此日心
言夫婦親義合如一身及至死生際何曾苦樂均
婦人一喪夫終身守孤子有如林中竹忽被風吹折
一折不重生枯死猶抱節男兒若喪婦能不暫傷情
應似門前柳逢春易發榮風吹一枝折還有一枝生
爲君委曲言願君再三聽須知婦人苦從此莫相輕

長安道

花枝缺處青樓開艷歌一曲酒一盃美人勸我急行

樂自古朱顏不再來君不見外州官客長安道一迴
來時一迴老

潛別離

不得哭潛別離不得語暗相思兩心之外無人知深
籠夜鏢獨棲烏利劍春斷連理枝河水雖濁有清日
烏頭雖黑有白時唯有潛離與暗別彼此甘心無後
期

隔浦蓮

隔浦愛紅蓮昨日看猶在夜來風吹落只得一回採
花開雖有明年期復愁明年還暫時

寒食

今

丘墟郭門外寒食誰家哭風吹曠野紙錢飛古墓纍
纍春草綠棠梨花映白楊樹盡是死生離別處冥漠
重泉哭不聞蕭蕭暮雨人歸去

琵琶引

并序

元和十年予左遷九江郡司馬明年秋送客湓浦口
聞舟中夜彈琵琶者聽其音錚錚然有京都聲問其
人本長安娼女嘗學琵琶於穆曹二善才年長色衰
委身為賈人婦遂命酒使快彈數曲曲罷憫然自叙
少小時歡樂事今漂淪憔悴轉徙於江湖間予出官
二年恬然自安感斯人言是夕始覺有遷謫意因為
長句歌以贈之凡六百一十二言命曰琵琶行

潯陽江頭夜送客楓葉荻花秋瑟瑟主人下馬客在
船舉酒欲飲無管絃醉不成歡慘將別別時茫茫江

浸月忽聞水上琵琶聲主人忘歸客不發尋聲暗問
彈者誰琵琶聲停欲語遲移船相近邀相見添酒回
燈重開宴千呼萬喚始出來猶抱琵琶半遮面轉軸
撥絃三兩聲未成曲調先有情絃絃掩抑聲聲思似
訴平生不得志低眉信手續續彈說盡心中無限事
輕攏慢撚抹復挑初爲霓裳後六么大絃嘈嘈如急
雨小絃切切如私語嘈嘈切切錯雜彈大珠小珠落
玉盤間關鶯語花底滑幽咽泉流水下灘水泉冷澁
絃凝絕凝絕不通聲漸歇別有幽愁暗恨生此時無
聲勝有聲銀瓶乍破水漿迸鉄騎突出刀鎗鳴曲終
收撥當心畫四絃一聲如裂帛東船西舫悄無言唯
見江心秋月白沉吟放撥插絃中整頓衣裳起歛容

自言本是京城女家在蝦蟇陵下住十三學得琵琶
成名屬教坊第一部曲罷長教善才服粧成每被秋
娘妬五陵年少爭纏頭一曲紅綃不知數鈿頭銀篦
擊節碎血色羅裙翻酒污今年歡笑復明年秋月春
風等閒度弟走從軍阿姨死暮去朝來顏色故門前
冷落鞍馬稀老大嫁作商人婦商人重利輕別離前
月浮梁買茶去去來江口守空船遶船明月江水寒
夜深忽夢少年事夢啼粧淚紅闌干我聞琵琶已嘆
息又聞此語重唧唧同是天涯淪落人相逢何必曾
相識我從去年辭帝京謫居卧病潯陽城潯陽地僻
無音樂終歲不聞絲竹聲住近湓江地低濕黃蘆苦
竹遶宅生其間旦暮聞何物杜鵑啼血猿哀鳴春江

花朝秋月夜往往取酒還獨傾豈無山歌與村笛嘔
啞潮嘶難爲聽今夜聞君琵琶語如聽仙樂耳暫明
莫辭更坐彈一曲爲君翻作琵琶行感我此言良久
立却坐促絃絃轉急淒淒不似向前聲滿座重聞皆
掩泣座中泣下誰最多江州司馬青衫濕

簡簡吟

蘇家小女名簡簡芙蓉花腮柳葉眼十一把鏡學點
粧十二抽針能綉裳十三行坐事調品不肯迷頭白
地藏玲瓏雲髻生花樣飄飄風袖薔薇香殊姿異態
不可狀忽忽轉動如有光二月繁霜殺桃李明年欲
嫁今年死丈人阿母勿悲啼此女不是凡夫妻恐是
天仙謫人世只合人間十三歲大都好物不堅牢綵
雲易散琉璃脆

花非花

花非花霧非霧夜半來天明去來如春夢幾多時去
似朝雲無覓處

醉後狂言酬贈蕭殷二協律

餘杭邑客多羈貧其間甚者蕭與殷天寒身上猶衣
葛日高甌中未拂塵江城山寺十一月北風吹沙雪
紛紛賓客不見緋袍惠黎庶未沾襦袴恩此時太守
自慙愧重衣複衾有餘温因命染人與針女先製兩
表贈二君吳綿細軟桂布密柔如狐腋白似雲勞將
詩書投贈我如此小惠何足論我有大裘君未見寬
廣和暖如陽春此裘非繒亦非纊裁以法度絮似仁

刀尺鈍拙製未畢出亦不獨裹一身若令在郡得五
考與君展覆杭州人

醉歌示妓人商玲瓏

罷胡琴掩秦瑟玲瓏再拜歌初畢誰道使君不解歌
聽唱黃雞與白日黃雞催曉丑時鳴白日催年酉時
沒腰間紅綬繫未穩鏡裡朱顏看已失玲瓏玲瓏奈
老何使君歌了汝更歌

白氏文集卷第十二

白氏文集卷第十三

律詩五言七言自兩韻至一百韻九十九首

代書詩一百韻寄微之

憶在貞元歲初登典校司身名同日授心事一言知

貞元中與微之同登科第俱授秘書省校書郎始相識也肺腑都無隔形骸兩不

羈踈狂屬年少閒散為官卑分定金蘭契言通藥石

規交賢方汲汲友直每怛怛有月多同賞無盃不共

持秋風拂琴匣夜月卷書帷高上慈恩塔幽尋皇子

陂唐昌玉蕊會崇敬牡丹期唐昌玉蕊會崇敬寺牡丹

笑勸迂辛酒閒吟短李詩辛大立度性疏嗜酒李二

迂辛短李之號儒風愛敦質佛理尚玄師劉三十二敦質有

佛理有可賞者度日曾無悶通宵靡不為雙聲聯律句八面

對宮基

雙聲聯句八面

往往遊三省騰騰出九達寒

銷直城路春到曲江池樹暖枝條弱山晴彩翠奇峯

攢石綠點柳苑麴塵絲岸草煙鋪地園花雪壓枝早

先紅照耀新溜碧透迤幄幕侵堤布盤筵占地施徵

伶皆絕藝選妓悉名姬鈿黛凝春態金鈿耀水嬉風

流誇墜髻時世聞啼眉貞元密坐隨歡

促華樽逐勝移香飄歌袂動翠落舞釵遺籌插紅螺

梳觥飛白玉卮打嫌調笑易飲訝卷波遲拋打曲有

酒曲有殘席誼譁散歸鞍酪酏騎配顏烏帽側醉袖

玉鞭垂紫陌傳鐘鼓紅塵塞路收幾時曾整別何處

不相隨荏苒星霜換迴環節候催兩衙多請假三考

欲成資運偶千年聖天成萬物宜皆當少壯日同惜

盛明時光景嗟虛擲雲霄竊聞窺攻文朝矻矻講學

夜孜孜策目穿如札時與微之鋒毫銳若錐

時與微之各有鐵鋒細管筆携繁張獲烏網堅守釣

魚坻謂自冬至夏類並受夔龍薦齊陳鼎董

詞萬言經濟畧三策太平基中第爭無敵專場戰不

疲輔車排勝陣掎角塞降旗並謂同鋪雙闕紛容衛

千僚儼等衰謂制舉人欲恩隨紫泥降名向白麻披

既在高科選還從好爵縻東垣君諫諍西邑我驅馳

元和年同登制科微再喜登烏府多慙侍赤墀四

之拜拾遺予授鹽屋尉官班分內外遊處遂參差每列鵷

鸞序偏瞻獬豸姿簡威寒凜列衣綵綉葳蕤正色摧

強禦剛腸嫉嗾常憎持祿位不擬保妻兒養勇當

除惡輸忠在滅私下鞫驚燕雀當道懾狐狸南國人
無怨東臺吏不欺微之使東原奏寃八十餘家理寃

多定國切諫甚辛毘造次行於是平生志在茲道將

心共直言與行兼危水暗波翻覆山藏路險巖未為

明主識已被倖臣疑木秀遭風折蘭芳遇霰萎千鈞

勢易壓一柱力難支騰口因成瘡吹毛遂得疵憂來

吟貝錦謫去詠江蘺邂逅塵中遇殷勤馬上辭賈生

離魏闕王粲向荆夷水過清源寺山經綺季祠心搖

漢臯珮淚墮峴亭碑並途中所歷也驛路綠雲際城樓枕

水湄思鄉多繞澤望闕獨登陴林晚青蕭索江平綠

渺瀰野秋鳴蟋蟀沙冷聚鷓鴣官舍黃茅屋人家苦

竹籬白醪充夜酌紅粟備晨炊寡鶴摧風翻鰥魚失

水鬢閣離啼渴且涼葉墜相思此四句兼含微一點

寒燈滅三聲曉角吹藍衫經雨故駉馬卧霜羸念涸

誰濡沫嫌醒自歎醜耳垂無伯樂舌在有張儀負氣

衝星劍傾心向日葵金言自銷鑠玉性肯磷緇伸屈

須看蠖窮通莫問龜定知身是患當用道為醫想子

今如彼嗟予獨在斯無慘當歲杪有夢到天涯坐阻

連襟帶行垂接履綦潤銷衣上霧香散室中芝念遠

緣遷貶驚時為別離素書三往復明月七盈虧自與

別經七月三度得書舊里非難到餘歡不可追樹依興善老

傍靜安衰微之宅在靜安坊西近興善寺前事思如昨中懷寫向誰

北村尋古栢南宅訪辛夷開元西北院即隋時龍村

馬微之宅中有辛夷兩樹常與微之遊息其下此日空搔首何人共解頤病

多知夜永年長覺秋悲不飲長如醉加食亦似飢狂吟一千字因使寄微之

和鄭元及第後秋歸洛下閒居同高侍郎下隔年及第

勤苦成名後優遊得意間玉憐同匠琢桂恨隔年攀山靜豹難隱谷幽鷺斲還微吟詩引步淺酌酒開顏門迥暮臨水窓深朝對山雲衢日相待莫誤許身閒

與諸同年賀座主侍郎新拜太常同宴蕭尚

書亭子座主於蕭尚書下及第得群字韻

寵新卿典禮會盛客徵文不失遷鶯侶因成賀燕群池臺晴間雪冠蓋暮和雲共仰曾攀處年深桂尚薰

東都冬日會諸同年宴鄭家林亭得先字

盛時陪上第暇日會群賢桂折因同樹鷺遷各異年

賓階紛紛組珮妓席儼花鈿促膝齊貧賤差肩次後

助歌林下水銷酒雪中天他日升沉者無忘共此筵

叙德書情四十韻上宣歙崔中丞宣州薦送及第後重

投此書

元聖生乘運忠賢出應期還將稽古力助立太平基土控吳兼越州連歙與池山河地襟帶軍鎮國藩維廉察安江甸澄清肅海夷股肱分外守耳目付中司楚老歌來暮秦人詠去思望如時雨至福似歲星移政靜民無訟刑行吏不欺搗謙驚主寵陰德畏人知白玉慙溫色朱繩讓直辭行為時領袖言作世著龜盛慕招賢士連營訓銳師光華下鷓鷯氣色動熊羆出入麾幢引登臨劔戟隨好風迎解榻美景待牽帷

晴野霞飛綺春郊柳宛絲城烏驚盡角江鴈避紅旗
藉草朱輪駐攀花紫綬垂山宜謝公屐洲稱柳家詩
酒氣和芳杜絃聲亂子規分毬齊馬首列舞匝蛾眉
醉惜年光晚歡憐日影遲迴塘排玉棹歸路擁金羈
自顧龍鍾者嘗蒙噢咻之仰山塵不讓涉海水難爲
身忝鄉人薦名因國士推提攜增善價拂拭長妍姿
射策端心術遷喬整羽儀幸窮楊遠葉謬折桂高枝
佩德潛書帶銘仁閤勒肌鞠躬趨館舍拜手挹階墀
霄漢程雖在風塵迹尚卑弊衣羞素布敗屋壓茅茨
養乏晨昏膳居無伏臘資盛時貧可耻壯歲病堪嗤
擢第名方立耽書力未疲磨鉛重剗割策蹇再奔馳
相馬涸憐瘦呼鷹正及飢扶搖重即事會有答恩詩

和渭北劉大夫借便秋遮虜寄朝中親友

巨鎮爲邦屏全材作國楨韜鈴漢上將文墨魯諸生
豹虎關西卒金湯渭北城寵深初受祭威重正揚兵
陣占山河布軍由水草行夏苗侵部落宵遁失藩營
雲隊攢戈戟風馳卷旆旌空烽火滅氣勝鼓鼙鳴
胡馬辭南牧周師罷北征迴頭問天下何處有攬槍

題故曹王宅

宅在檀溪

甲第何年置朱門此地開山當賓閣出溪繞妓堂迴
覆井桐新長蔭窻竹舊栽池荒紅茵苔砌老綠莓苔
捐館梁王去思人楚客來西園飛蓋處依舊月徘徊

自江陵之徐州路上作寄兄弟

岐路南將北離憂弟與兄關河千里別風雪一身行

夕宿勞鄉夢晨裝慘旅情家貧憂後事日短念前程
煙鴈翻寒渚霜鳥聚古城誰憐陟岡者西楚望南荆

酬哥舒大見贈

去年與哥舒等八人同登科第今叙會散之意

去歲遊歡何處去

一作好

曲江西岸杏園東花下忘歸

因美景樽前勸酒是春風各從微宦風塵裏共度流
年離別中今日相逢愁又喜八人分散兩人同

和談校書秋夜感懷呈朝中親友

遙夜涼風楚客悲清砧繁漏月高時秋霜似髮年空
長春草如袍位尚卑詞賦擅名來已久烟霄得路去
何遲漢庭卿相皆知已不薦揚雄欲薦誰

感秋寄遠

惆悵時節晚兩情千里同離憂不散處庭樹正秋風

鸞影動歸翼蕙香銷故叢佳期與芳歲牢落兩成空

春題華陽觀

觀即華陽公主故宅有舊內人存焉

帝子吹簫逐鳳皇空留仙洞號華陽落花何處堪惆
悵頭白宮人掃影堂

大雨中贈元九

不堪紅葉青苔地又是涼風暮雨天莫怪獨吟秋思
苦比君校近二毛年

城中閒遊

寵辱憂歡不到情任他朝市自營營獨尋秋景城東
去白鹿原頭信馬行

答韋八

麗句勞相贈佳期恨有違早知留酒待悔不趁花歸

春盡綠醅老雨多紅萼稀今朝如一醉猶得及芳菲
華陽觀桃花時招李六拾遺飲

華陽觀裏仙桃發把酒看花心自知爭忍開時不同
醉明朝後日即空枝

和友人洛中感春

莫悲金谷園中月莫歎天津橋上春若學多情尋往
事人間何處不傷神

送張南簡入蜀

昨日詔書下求賢訪陸沉無論能與否皆起徇名心
君獨南遊去雲山蜀路深

寄陸補闕前年同登科

忽憶前年科第後此時鷄鶴整同群秋風惆悵須吹

散鷄在庭前鶴在雲

華陽觀中八月十五日夜招友翫月

人道秋中明月好欲邀同賞意如何華陽洞裏秋壇
上今夜清光此處多

曲江憶元九

春來無伴閒遊少行樂三分減二分何況今朝杏園
裏閒人逢盡不逢君

過劉三十二故宅

不見劉君來近遠門前兩度滿枝花朝來惆悵宣平
過柳巷當頭第一家

下邳莊南桃花

村南無限桃花發唯我多情獨自來日暮風吹紅滿

地無人解惜為誰開

三月三十日題慈恩寺

慈恩春色今朝盡盡日徘徊倚寺門惆悵春歸留不
得紫藤花下漸黃昏

看暉家牡丹花戲贈李二十

香勝燒蘭紅勝霞城中最數令公家人人散後君須
看歸到江南無此花

春中與盧四周鯨華陽觀同居

性情懶慢好相親門巷蕭條稱作鄰背燭共憐深夜
月踏花同惜少年春杏壇住僻雖宜病芸閣官微不
救貧文行如君尚憔悴不知霄漢待何人

自城東至以詩代書戲招李六拾遺崔二十

六先輩

青門走馬趁心期惆悵歸來已校遲應過唐昌玉蕊
後當崇敬牡丹時蹔遊還憶崔先輩欲醉先邀李
拾遺尚殘半月芸香俸不作歸糧作酒資

盤屋縣北樓望山

自此後詩
為尉時作

一為趨走吏塵土不開顏孤負平生眼今朝始見山
縣西郊秋寄贈馬造

紫閣峯西清渭東野煙深處夕陽中風荷老葉蕭條
綠水蓼殘花寂寞紅我厭宦遊君失意可憐秋思兩

心同

別韋蘇州

白年愁裏過萬感醉中來惆悵城西別愁眉兩不開

戲題新栽薔薇時對盤屋

移根易地莫憔悴
野外庭前一種春
少府無妻春寂寞
花開將爾當夫人

酬王十八李大見招遊山

自憐幽會心期阻
復愧嘉招書信頻
王事牽身去不得
滿山松雪屬他人

縣南花下醉中留劉五

百歲幾迴同酌
一年今日最芳菲
願將花贈天台女
留取劉郎到夜歸

宿楊家

楊氏弟兄俱醉卧
披衣獨起下高齋
夜深不語中庭立
月照藤花影下階

醉中留別楊六兄弟三月十日別

春初攜手春深散
無日花間不醉狂
別後何人堪共醉
猶殘十日好風光

醉中歸盤屋

金光門外昆明路
半醉騰騰信馬迴
數日非關王事繫
牡丹花盡始歸來

遊雲居寺贈穆三十六地主

亂峯深處雲居路
共踏花行獨惜春
勝地本來無定主
大都山屬愛山人

和王十八薔薇澗花時有懷蕭侍御兼見贈

霄漢風塵俱是繫
薔薇花委故山深
憐君獨向澗中立
一把紅芳三處心

再因公事到駱口驛

今年到時夏雲白去年來時秋樹紅兩度見山心有愧皆因王事到山中

期李二十文略王十八質夫不至獨宿仙遊寺

文略也從牽吏役質夫何故戀囂塵始知解愛山中宿千萬人中無一人

酬趙秀才贈新登科諸先輩

莫羨蓬萊鸞鶴侶道成羽翼自生身君看名在丹臺者盡是人間修道人

過天門街

雪盡終南又欲春遙憐翠色對紅塵千車萬馬九衢

上迴首看山無一人

惜玉藥花有懷集賢王校書起

芳意將闌風又吹白雲離葉雪辭枝集賢讎校無閒日落盡瑤花君不知

春送盧秀才下第遊太原謁嚴尚書

未將時會合且與俗浮沈鴻養青冥翮蛟潛雲雨心煙郊春別遠風磧暮程深墨客投何處并州舊翰林長安送柳大東歸

白社羈遊伴青門遠別離浮名相引住歸路不同歸送文暢上人東遊

得道即無著隨緣西復東貌依年臘老心到夜禪空山宿馴溪虎江行濾水蟲悠悠塵客思春滿碧雲中

社日關路作

晚景函關路涼風社日天青巖新有鷺紅樹欲無蟬
愁立驛樓上厭行官堠前蕭條秋興苦漸近二毛年
重到毓材它有感

欲入中門淚滿巾庭花無主兩迴春軒窓簾幕皆依
舊只是堂前欠一人

亂後過流溝寺

九月徐州新戰後悲風殺氣滿山河唯有流溝山下
寺門前依舊白雲多

歎髮落

多病多愁心自知行年未老髮先衰隨梳落去何須
惜不落終須變作絲

留別吳七正字

成名共記甲科上署吏同登芸閣間唯是塵心殊道
性秋蓬常轉水長閒

除夜宿洛州

家寄關西住身為河北遊蕭條歲除夜旅泊在洛州
邯鄲冬至夜思家

邯鄲驛裏逢冬至抱膝燈前影伴身想得家中夜深
坐還應說著遠行人

冬至夜懷湘靈

豔質無由見寒衾不可親何堪最長夜俱作獨眠人
感故張僕射諸妓

黃金不惜買蛾眉揀得如花三四枝歌舞教成心力

盡一朝身去不相隨

遊仙遊山

聞將心地出人間五六年來人怪閒自嫌戀着未全
盡猶愛雲泉多在山

見尹公亮新詩偶贈絕句

袖裏新詩十首餘吟看句句是瓊琚如何持此將干
謁不及公卿一字書

長安閒居

風竹煙松晝掩關意中長似在深山無人不怪長安
住何獨朝朝暮暮閒

早春獨遊曲江
時為校書郎

散職無羈束羸驂少送迎朝從直城出春傍曲江行

風起池東暖雲開山北晴冰銷泉脉動雪盡草芽生
露杏紅初拆烟楊綠未成影遲新度鴈聲遊欲啼鶯
關地心俱靜韶光眼共明酒狂憐性逸藥効喜身輕
慵慢疎人事幽棲逐野情迴看芸閣笑不似有浮名

秘書省中憶舊山

厭從薄宦校青簡悔別故山思白雲猶喜蘭臺非傲
吏歸時應免動移文

涼夜有懷
自此後詩並未應舉時作

清風吹枕席白露濕衣裳好是相親夜漏遲天氣涼

送武士曹歸蜀
士曹即武中丞兄

花落鳥嚶嚶南歸稱野情月宜秦嶺宿春好蜀江行
鄉路通雲棧郊扉近錦城烏臺陟岡送人羨別時榮

江南送北客因憑寄徐州兄弟書時年十五
故園望斷欲何如楚水吳山萬里餘今日因君訪兄
弟數行鄉淚一封書

賦得古原草送別

離離原上草一歲一枯榮野火燒不盡春風吹又生
遠芳侵古道晴翠接荒城又送王孫去萋萋滿別情
夜哭李夷道

者絕影響空庭朝復昏家人哀臨畢夜鑱壽堂門
無妻無子何人葬空見銘旌向月翻

病中作時年十八

久爲勞生事不學攝生道年少已多病此身豈堪老

秋江晚泊

扁舟泊雲島倚棹念鄉國四望不見人烟江澹秋
客心貧易動日入愁未息

旅次景空寺宿幽上人院

不與人境接寺門開向山暮鐘鳴鳥聚秋雨病僧間
月隱雲樹外螢飛廊宇間幸投花界宿暫得靜心顏
長安正月十五日

誼誼車騎帝王州羈病無心逐勝遊明月春風三五
夜萬人行樂一人愁

過高將軍墓

原上新墳委一身城中舊宅有何人妓堂賓閣無歸
日野草山花又欲春門客空將感恩淚白楊風裏一
霑巾

寒食卧病

病逢佳節長歎息。春雨濛濛榆柳色。羸坐全非舊日容。扶行半是他人力。誼誼里巷踏青歸。笑閉柴門度寒食。

宿桐廬館同崔存度醉後作

江海漂漂共旅遊。一樽相勸散窮愁。夜深醒後愁還在。雨滴梧桐山館秋。

江樓望歸時避難在越中

滿眼雲水色。月明樓上人。旅愁春入越。鄉夢夜歸秦。道路通荒服。田園隔虜塵。悠悠滄海畔。十載避黃巾。

除夜寄弟妹

感時思弟妹。不寐百憂生。萬里經年別。孤燈此夜情。

病容非舊日。歸思逼新正。早晚重歡會。羈離各長成。

寒食月夜

風香露重梨花濕。草舍無燈愁未入。南鄰北里歌吹時。獨倚柴門月中立。

感芍藥花寄正一上人

今日階前紅芍藥。幾花欲老幾花新。開時不解比色相。落後始知如幻身。空門此去幾多地。欲把殘花問上人。

晚秋閒居

地僻門深少送迎。披衣閒坐養幽情。秋庭不掃攜藤杖。閒踏梧桐黃葉行。

秋暮郊居書懷

郊居人事少。晝卧對林巒。窮巷厭多雨。貧家愁早寒。
葛衣秋未換。書卷病仍看。若問生涯計。前溪一釣竿。
為薛台悼亡

半死梧桐老病身。重泉一念一傷神。手攜稚子夜歸
院。月冷房空不見人。

途中寒食

路傍寒食行人盡。一作絕獨占春愁在路傍。馬上垂鞭
愁不語。風吹百草野田香。

題流溝寺古松

煙葉葱蘢蒼麕尾。霜皮剝落紫龍鱗。欲知松老看塵
壁。死却題詩幾許人。

感月悲逝者

存亡感月一潸然。月色今宵似往年。何處曾經同
月。櫻桃樹下後堂前。

代鄰叟言懷

人生何事心無定。宿昔如今意不同。宿昔愁身不得
老。如今恨作白頭翁。

自河南經亂關內阻飢兄弟離散各在一處
因望月有感聊書所懷寄上浮梁大兄於
潛七兄烏江十五兄兼示符離及下邳弟
妹

時難年荒世業空。弟兄羈旅各西東。田園寥落干戈
後。骨肉流離道路中。弔影分為千里鴈。辭根散作九
秋蓬。共看明月應垂淚。一夜鄉心五處同。

長安早春旅懷

軒車歌吹諠都邑中有一人向隅立夜深明月卷簾
愁日暮青山望鄉泣風吹新綠草芽折雨灑輕黃柳
條濕此生知負少年春不展愁眉欲三十

寒閨夜

夜半衾裯冷孤眠懶未能籠香銷盡火巾淚滴成冰
為惜影相伴通宵不滅燈

寄湘靈

淚眼凌寒凍不流每經高處即迴頭遙知別後西樓
上應凭欄干獨自愁

冬至宿楊梅館

十一月中長至夜三千里外遠行人若為獨宿楊梅

館冷枕單東一病身

臨江送夏瞻瞻年七十餘

悲君老別我雲巾七十無家萬里身愁見舟行風又
起白頭浪裏白頭人

冬夜示敏巢時在東都宅

爐火欲銷燈欲盡夜長相對百憂生他時諸處重相
見莫忘今宵燈下情

客中守歲在柳家莊

守歲樽無酒思鄉淚滿巾始知為客苦不及在家貧
畏老偏驚節防愁預惡春故園今夜裏應念未歸人

問淮水

自嗟名利客擾擾在人間何事長淮水東流亦不聞

宿樟亭驛

夜半樟亭驛愁人起望鄉月明何所見潮水白茫茫

及第後憶舊山

偶獻子虛登上第却吟招隱憶中林春蘿秋桂莫惆悵縱有浮名不繫心

題李次雲窓竹

不用裁爲鳴鳳管不須截作釣魚竿千花百草凋零後留向紛紛雪裏看

花下自勸酒

酒盞酌來須滿滿花枝看卽落紛紛莫言三十是年少百歲三分已一分

題李十一東亭

相思夕上松臺立蛩思蟬聲滿耳秋惆悵東亭風月好主人今夜在鄜州

春村

二月村園暖桑間戴勝飛農夫春舊穀蠶妾擣新衣牛馬因風遠鷄豚過社稀黃昏林下路鼓笛賽神歸

題施山人野居

得道應無著謀生亦不妨春泥秧稻暖夜火焙茶香水巷風塵少松齋日月長高閒真是貴何處覓侯王

白氏文集卷第十三

白氏文集卷第十四

律詩

五言七言自兩韻至一百韻凡一百首

翰林中送獨孤二十七起居罷職出院

碧落留雲住青冥放鶴還銀臺向南路從此到人間

重尋杏園

忽憶芳時頻酌酊却尋醉處重徘徊杏花結子春深後誰解多情又獨來

曲江獨行

自此後詩在翰林時作

獨來獨去何人識廐馬朝衣野客心閒愛無風水邊坐楊花不動樹陰陰

同李十一醉憶元九

花時同醉破春愁醉斬花枝作酒籌忽憶故人天際

去計程今日到京州

同錢員外題絕糧僧巨川

三十年來坐對山唯將無事化人間齋時往往聞
笑一食何如不食閒

絕句代書贈錢員外

欲尋秋景間行去君病多慵我興孤可惜今朝山最
好強能騎馬出來無

晚秋有懷鄭中舊隱

大高風嫋嫋鄉思統關河寒落歸山夢殷勤採蕨歌
竹添心寂寞愁入髮蹉跎晚樹蟬鳴少秋江日上多
以閒羨雲鶴久別愧烟蘿其奈丹墀上君恩未報何
禁中九日對菊花酒憶元九元九詩云不是
花中唯愛菊此

花開盡
更無花

賜酒盈杯誰共持官花滿把獨相思相思只傍花邊
立盡日吟君詠菊詩

送王十八歸山寄題仙遊寺

曾於太白峯前住數到仙遊寺更來黑水澄時潭底
出白雲破處洞門開林間暖酒燒紅葉石上題詩掃
綠苔惆悵舊遊無復到菊花時節羨君迴

答張籍因以代書

憐君馬瘦衣裘薄許到江東訪鄙夫今日正閒天又
暖可能無病暫來無

曲江早春

曲江柳條漸無力杏園伯勞初有聲可憐春淺遊人

少好傍池邊下馬行

見元九悼亡詩因以此寄

夜淚闇銷明月幌春觴遙斷牡丹庭人間此病治無藥
唯有楞伽四卷經

寒食夜

無月無燈寒食夜夜深猶立闇花前忽因時節驚年
幾四十如今欠一年

杏園花落時招錢員外同醉

花園欲去去應遲正是風吹狼藉時近西數樹猶堪
醉半落春風半在枝

重題西明寺牡丹時元九在江陵

往年君向東都去曾歎花時君未迴今年况作江陵

別惆悵花前又獨來只愁離別長如此不道明年春
不開

同錢員外禁中夜直

宮漏三聲知半夜好風涼月滿松筠此時閒坐寂無
語藥樹影中唯兩人

禁中夜作書與元九

心緒萬端書兩紙欲封重讀意遲遲五聲宮漏初鳴
後一點窓燈欲滅時

八月十五日夜禁中獨直對月憶元九

銀臺金闕夕沉沉獨宿相思在翰林三五夜中新月
色二千里外故人心渚宮東面煙波冷浴殿西頭鐘
漏深猶恐清光不同見江陵卑濕足秋陰

寄陳式五兄

年來白髮兩三莖憶別君時髭未生惆悵料君應滿
髮當初是我十年兄

庾順之以紫霞綺遠贈以詩荅之

千里故人心鄭重一端香綺紫氛氲開緘日映晚霞
色滿幅風生秋水紋爲褥欲裁憐葉破製裘將翦惜
花分不如縫作合歡被寤寐相思如對君

送元八歸鳳翔

莫道岐州二日程其如風雪一身行與君况是經年
別暫到城來又出城

雨雪放朝因懷微之

歸騎紛紛滿九衢放朝三日爲泥塗不知雨雪江陵

府今日非衙得免無

詠懷

歲去年來塵土中眼看變作白頭翁如何辦得歸山
計兩頃村田一畝宮

聞微之江陵卧病以大通中散碧腴垂雲膏

寄之因題四韻

已題一帖紅消散又封一合碧雲英憑人寄向江陵
去道路迢迢一月程未必能治江上瘴且圖遙慰病
中情到時想得君拈得枕上開看眼暫明

○扇錢真外雪中見寄

松雪無塵小院寒閉門不似住長安煩君想我看心
坐報道心空無可看

重酬錢貞外

雪中重寄雪山偈問答殷勤四句中本立空名緣破
妄若能無妄亦無空

獨酌憶微之

時對所
贈蓋

獨酌花前醉憶君與君春別又逢春惆悵銀杯來處
重不曾盛酒勸閒人

微之宅殘牡丹

殘紅零落無人賞雨打風吹花不全諸處見時猶悵
望况當元九小庭前

新磨鏡

衰容當晚節秋鏡偶新磨一與清光對方知白髮多
髮毛從幻化心池付頭陀任意渾成雪其如似夢何

感髮落

昔日愁頭白誰知未白衰眼看應落盡無可變成絲
八月十五日夜聞崔大貞外翰林獨直對酒

翫月因懷禁中清景偶題是詩

秋月空懸高碧外仙郎靜翫禁闈間歲中唯有今宵
好海內無如此地閒皓色分明雙闕勝清光深到九
門關遙聞獨醉還惆悵不見金波照玉山

酬王十八見寄

秋思太白峯頭雪晴憶仙遊洞口雲未報皇恩歸未
得慙君為寄北山文

立春日酬錢貞外曲江同行見贈

下直遇春日垂鞭出禁闈兩人攜手語十里看山歸

柳色早黃淺水紋新綠微風光向晚好車馬近南稀
機盡笑相顧不驚鷗鷺飛

和錢貞外青龍寺上方望舊山

舊峯松雪舊溪雲悵望今朝遙屬君共道使臣非俗
吏南山莫動北山文

宴周皓大夫光福宅

座上作

何處風光最可憐妓堂階下砌臺前軒車擁路光照
地絲管入門聲沸天綠蕙不香饒桂酒紅櫻無色讓
花鈿野人不敢求他事唯借泉聲伴醉眠

晚秋夜

碧空溶溶月華靜月裏愁人弔孤影花開殘菊傍踈
籬葉下衰桐落寒井塞鴻飛急覺秋盡鄰鷄鳴遲知

夜永凝情不語空所思風吹白露衣裳冷

惜牡丹花二首

一首翰林院北廳花下作一首新昌竇給事中宅南亭花

作

惆悵階前紅牡丹晚來唯有兩枝殘明朝風起應吹
盡夜惜衰紅把火看

二

寂寞菱紅低向雨離披破豔散隨風晴明落地猶惆
悵何況飄零泥土中

荅元奉禮同宿見贈

相逢俱歎不聞身直日常多齋日頻晚鼓一聲分散
去明朝風景屬何人

荅馬侍御見贈

白集七四

謬入金門侍玉除煩君問我意何如蟠木詎堪明主
用籠禽徒與故人踈苑花似雪同隨輦宮月如眉伴
直廬淺薄求賢思自代嵇康莫寄絕交書

上元日恩賜曲江宴會即事

賜歡仍許醉此會興如何翰苑主恩重曲江春意多
花低羞豔妓鶯散讓清歌共道昇平樂元和勝求和
夜惜禁中桃花因懷錢員外

前日歸時花正紅今夜宿時枝半空坐惜殘芳君不
見風吹狼藉月明中

和錢員外早冬翫禁中新菊

禁署寒氣遲孟冬菊初拆新黃間繁綠爛若金照碧
仙郎小隱日心似陶彭澤秋憐潭上看日慣籬邊摘

今來此地賞野意潛目適金馬門內花玉山峯下
寒芳引清句吟翫煙景夕賜酒色偏宜握蘭香不敵
淒淒百卉死歲晚冰霜積唯有此花開殷勤助君惜

錢嘗君藍田山下故云

答劉戒之早秋別墅見寄

涼風木槿籬暮雨槐花枝併起新秋思為得故人詩
避地鳥擇木入朝魚在池城中與山下喧靜閣相思
涼夜有懷

念別感時節早蛩聞一聲風簾夜涼入露篔秋意生
燈盡夢初罷月斜天未明闇疑無限思起傍藥欄行

秋思

病眠夜少夢聞立秋多思寂寞餘雨晴蕭條早寒至

鳥棲紅葉樹月照青苔地何況鏡中年又過三十二

禁中聞虫

悄悄禁門閉夜深無月明西窓獨闌坐滿耳新蛩聲

秋蟲

切切闌窓下嚶嚶深草裏秋天思婦心雨夜愁人耳

贈別宣上人

上人處世界清淨何所似似彼白蓮花在水不着水性真悟泡幻行潔離塵滓修道來幾時身心俱到此嗟予牽世網不得長依止離念與碧雲秋來朝夕起

春夜喜雪有懷王二十二

夜雪有佳趣幽人出書帷微寒生枕席輕素對階墀

楚絃曲起吟班扇詩明宜滅燭後淨愛寒窗靜

窓引曙色早庭銷春氣遲山陰應有興不卧待微之

訓和元九東川路詩十二首

十一二篇皆因景境退惟舊事不

能一曲叙臣隨而和之唯予與元微之耳

駱口驛舊題詩

拙詩在壁無人愛烏汙苔侵文字殘唯有多情元侍御繡衣不惜拂塵看

南秦雪

往歲曾為西邑吏慣從駱口到南秦三時雲冷多飛雪二月山寒少有春我思舊事猶惆悵君作初行定苦辛仍賴愁猿寒不叫若聞猿叫更愁人

山枇杷花二首

萬重青嶂蜀門口一樹紅花山頂頭春盡憶家歸未

得低紅如解替君愁

二

葉如裙色碧紗淺花似芙蓉紅粉輕若使此花兼解語推囚御史定違程

江樓月

嘉陵江曲曲江池明月雖同人別離一宵光景潛相憶兩地陰晴遠不知誰料江邊懷我夜正當池畔望君時今朝共語方同悔不解多情先寄詩

亞枝花

山郵花木似平陽愁殺多情驄馬郎還似昇平池畔坐低頭向水自看粧

江上笛

江上何人夜吹笛聲聲似憶故園春此時聞者堪頭白况是多愁少睡人

嘉陵夜有懷二首

露濕墻花春意深西廊月上半床陰憐君獨卧無言語惟我知君此夜心

二

不明不闇朦朧月非暖非寒慢慢風獨卧空牀好天氣平明閒事到心中

夜深行

百年關外夜行客三殿角頭宵直人莫道近臣勝遠使其如同是不閒身

望驛臺

三月三十日

靖安宅裏當窓柳望驛臺前撲地花兩處春風同日
盡居人思客客思家

江岸梨

梨花有意綠和葉一樹江頭惱殺君最似嬌閨少年
婦白粧素袖碧紗裙

荅謝家最小偏憐女

感元九悼亡詩
因為代荅三首

嫁得梁鴻六七年耽書愛酒日高眠雨荒春圃唯生
草雪壓朝厨未有煙身病憂來綠女少家貧忘却為
夫賢誰知厚俸今無分枉向秋風吹紙錢

荅騎馬入空臺

君入空臺去朝往暮還來我入泉臺去泉門無復開
鰥夫仍繫職稚女未勝哀寂寞咸陽道家入覆墓迴

荅山驛夢

入君旅夢來千里閉我幽魂欲二年莫忘平生行坐
處後堂階下竹叢前

和元九與呂二同宿話舊感贈

見君新贈呂君詩憶得同年行樂時爭入杏園齊馬
首潛過柳曲鬪蛾眉八人雲散俱遊宦七度花開盡
別離聞道秋娘猶且在至今時復問微之

憶元九

渺渺江陵道相思遠不知近來文卷裏半是憶君詩

○蕭貞外寄新蜀茶

蜀茶寄到但驚新渭水煎來始覺珍滿甌似乳堪持
翫况是春深酒渴人

寄上大兄

已後詩在
郡林居作

秋鴻過盡無書信。病戴紗巾。強出門。獨上荒臺東北。望日西愁立到黃昏。

病中哭金鑾子孫名

豈料吾方病。翻悲汝不全。卧驚從枕上。扶哭就燈前。有女誠為累。無兒豈免憐。病來纔十日。養得已三年。慈淚隨聲迸。悲傷遇物牽。故衣猶架上。殘藥尚頭邊。送出深村巷。看封小墓田。莫言三里地。此別是終天。

寄內

桑條初綠即為別。柿葉半紅猶未歸。不知村婦知時節。解為田夫秋擣衣。

病氣

自知氣發每因情。情在何由氣得平。若問病根深與淺。此身應與病齊生。

歎元九

不入城中來五載。同時班列盡官高。何人牢落猶依舊。唯有江陵元士曹。

眼暗

早年勤倦看書苦。晚歲悲傷出淚多。眼損不知都自取。病成方悟欲如何。夜昏乍似燈將滅。朝闇長疑鏡未磨。千藥萬方治不得。唯應閉目學頭陀。

得袁相書

穀苗深處一農夫。面黑頭斑手把鋤。何意使人猶識我。就田來送相公書。

病中作

病來城裏諸親故厚薄親疎心
慙知唯有蔚章於我分深於同在翰林時

感化寺見元九劉三十二題名處

微之謫去千餘里太白無來十一年
今日見名如見面塵埃壁上破窓前

遊悟貞寺廻山下別張殷衡

世緣未了治不得孤負青山心
共知愁君又入都門去即是紅塵滿眼時

村居寄張殷衡

金氏村中一病夫生涯濩落性靈迂
唯看老子五千字不蹋長安十二衢
藥鈿夜傾殘酒暖竹床寒取舊

甕鋪聞君欲發江東去能到茅菴訪別無

病中得樊大書

荒村破屋經年卧寂絕無人問病身
唯有東都樊著作至今書信尚殷勤

開元九詩書卷

紅箋白紙兩三束半是君詩半是書
經年不展緣身病今日開看生蠹魚

晝卧

抱枕無言語空房獨悄然誰知盡日卧
非病亦非眠夜坐

庭前盡日立到夜燈下有時坐徹明
此情不語何人會時復長吁一兩聲

暮立

黃昏獨立佛堂前
滿地槐花滿樹蟬
大抵四時心
捻苦就中腸斷是秋天

有感

絕絃與斷絲猶有
却續時唯
有衷腸斷無應續得期

答友問

似玉童顏盡如霜
病髮新莫驚身頓老
心更老於身

村夜

霜草蒼蒼蟲切切
村南村北行人絕
獨出門前望野田
月明蕎麥花如雪

聞蟲

聞蟲唧唧夜絲絲
况是秋陰欲雨天
猶恐愁人暫得

睡聲聲移近卧床前

寒食夜有懷

寒食非長非短夜
春風不熱不寒天
可憐時節堪相憶
何况無燈各早眠

贈內

漠漠闇苔新雨地
微微涼露欲秋天
莫對月明思往事
損君顏色減君年

得錢舍人書問眼疾

春來眼闇少心情
點盡黃連尚未平
唯得君書勝得藥
開緘未讀眼先明

還李十一馬

傳語李君勞寄馬
病來唯拄杖扶身
縱擬強騎無出

處却將牽與趁朝人

九日寄行簡

摘得菊花攜得酒
遶村騎馬思悠悠
下邳田地平如掌
何處登高望梓州

夜坐

斜月入前楹
迢遙夜坐情
梧桐上階影
蟋蟀近牀聲
曙傍窓間至
秋從簾上生
感時因憶事
不寢到鷄鳴

村居二首

田園莽蒼經春早
籬落蕭條盡日風
若問經過談笑者
不過田舍白頭翁

二

門閉仍逢雪
厨寒未起煙
貧家重寥落
半爲日高眠

早春

雪散因和氣
冰開得暖光
春銷不得處
唯有鬢邊霜

和夢遊春詩一百韻并序

微之旣到江陵
又以夢遊春詩七十韻寄予
且題其序曰
斯言也不可使不知吾者
知吾者亦不可使不知樂天
知吾也
吾不敢不使吾子知予辱斯言
三復其旨
大抵悔旣往而悟將來也
然予以爲苟不悔不寤則已
若悔於此則宜悟於彼也
反於彼而悟於妄則宜歸於真也
况與足下外服儒風
內宗梵行者有日矣
而今而後非覺路之返也
非空門之歸也將安反乎
將安歸乎
今所和者其章旨卒歸於此
夫感不甚則悔不熟
感不至則悟不深
故廣足下七十韻

為一百韻重為足下陳夢遊之中所以甚感者叙婚
仕之際所以至感者欲使曲盡其妄周知其非然後
返乎真歸乎實亦猶法華經序火宅偈化城維摩經
入娑舍過酒肆之義也微之微之予斯文也猶不可
使不知吾者知幸藏之云爾

昔君夢遊春夢遊仙山曲恍若有所遇似愜平生欲
因尋菖蒲水漸入桃花谷到一紅樓家愛之看不足
池流渡清泚草嫩蹋綠蓀柳閣全低簷櫻紅半熟
轉行深深院過盡重重屋烏龍臥不驚青鳥飛相逐
漸聞玉珮響始辨珠履躡遙見窓下人娉婷十五六
霞光抱明月蓮艷開初旭縹緲雲雨仙氛氲蘭麝馥
風流薄梳洗時世寬粧束袖輒異文綾裾輕單絲縠

裙腰銀線壓梳掌金筐感帶纈紫蒲葑袴花紅石竹
疑情都未語付意微相矚眉斂遠山青鬟低片雲綠
帳牽翡翠帶被解鴛鴦襖秀色似堪食穠華如可掬
半卷錦頭席斜鋪繡腰褥朱脣素指勻粉汗紅綿撲
心驚睡易覺夢斷蒐難續籠委獨棲禽劒分連理木
存誠期有感誓志貞無黷京洛八九春未曾花裏宿
壯年徒自棄佳會應無復鸞歌不重聞鳳兆從茲卜
韋門女清貴裴氏甥賢淑羅扇夾花燈金鞍攢繡轂
既傾南國貌遂坦東床腹劉阮心漸忘潘楊意方睦
新修履信第初食尚書祿九醞備聖賢八珍窮水陸
秦家重蕭史彥輔憐衛叔朝饌饋獨盤夜醪傾百斛
親賓盛輝赫妓樂紛曄煜宿醉纔解醒朝歡俄枕麴

飲過君子爭令甚將軍酷酪酊歌鷓鴣顛狂舞鳩鴿
月流春夜短日下秋天速謝傳隙過駒蕭娘風送燭
全凋薜花折半死梧桐禿閣鏡對孤鸞哀絃留寡鵠
凄凄隔幽顯冉冉移寒燠萬事此時休百身何處贖
提攜小兒女將領舊姻族再入朱門行一傍青樓哭
歷空無既馬水涸失池驚搖落廢井梧荒涼故籬菊
莓苔上几閣塵土生琴筑舞榭綴蠨蛸歌梁聚蝙蝠
嫁分紅粉妾賣散蒼頭僕門容思徬徨家人泣伊噢
心期正蕭索宦序仍拘跼懷策入嶠函驅車辭邾郕
逢時念旣濟聚學思大畜端詳筮仕著磨拭穿楊鏃
始從讎校職首中賢良目一拔侍瑤墀再升紆繡服
誓酬君王寵願使朝廷肅密勿奏封章清明操憲續

鷹鷂中病下豸角當邪觸糾謬盡東周申寃動南蜀
危言詆閹寺直氣忤鈞軸不忍曲作鈞乍能折爲王
捫心無愧畏騰口有謗讟只要明是非何曾虞禍福
車摧太行路劒落酆城獄襄漢問修途荆蠻指殊俗
謫爲江府掾遣事荊州牧趨走謁麾幢喧煩視鞭扑
簿書常自領縲囚每親鞫竟日坐官曹經旬曠休沐
宅荒渚官草馬瘦畝田粟薄俸等涓毫微官同桎梏
月中照形影天際辭骨肉鶴病翅羽垂獸窮爪牙縮
行看鬚問白誰勸盃中綠時傷大野麟命問長沙鵬
夏梅山雨漬秋瘴海雲毒巴水白茫茫楚山青簇簇
吟君七十韻是我心所蓄旣去誠莫追將來幸前勗
欲除憂惱病當取禪經讀湏悟事皆空無令念將屬

請思遊春夢此夢何閃倏艷色即空花浮生乃焦穀
良姻在佳偶頃刻為單獨入仕欲榮身湏臾成黜辱
合者離之始樂兮憂所伏愁恨僧祇長歡榮刹那促
覺悟因傍喻迷執由當局膏明誘闇蛾陽焱奔癡鹿
貪為苦聚落愛是悲林麓水蕩無明波輪迴死生輻
塵應甘露灑垢待醍醐浴障要智燈燒魔須慧刀戮
外熏性易染內戰心難泐法句與心玉期君日三復
微之常以法句及心王頤施
經相示故申言以卒其志也

王昭君二首

時年十七

滿面胡沙滿髮風眉銷殘黛臉銷紅愁苦辛勤憔悴
盡如今却是畫圖中

二

漢使却迴憑寄語黃金何日贖蛾眉君王若問妾顏
色莫道不如宮裏時

白氏文集卷第十四

白氏文集卷第十五

律詩

五言七言自兩韻至一百韻九十九首

渭村退居寄禮部崔侍郎翰林錢舍人詩一

百韻

聖代元和歲閒居渭水陽不才甘命舛多幸遇時康
 朝野分倫序賢愚定否臧重文疎卜式尚少棄馮唐
 由是推天運從茲樂性場籠禽放高翥霧豹得深藏
 世慮休相擾身謀且自強猶須務衣食未免事農桑
 薤草通三徑開田占一坊晝扉肩白版夜碓掃黃梁
 隙地治場圃閒時糞土疆枳籬編刺夾薤壟擘科秧
 穡力嫌身病農心願歲穰朝衣典杯酒佩劔博牛羊
 困倚栽松鍾饑提採蕨筐引泉來後澗移竹下前岡

陳氏 康

生計雖勤苦家資甚渺茫塵埃常滿甌錢帛少盈囊
弟病仍扶杖妻愁不出房傳衣念楹樓舉案笑糟糠
犬吠村胥鬧蟬鳴織婦忙納租看縣帖輸粟問軍倉
夕歌攀村樹秋行遶野塘雲容陰慘澹月色冷悠揚
蕎麥鋪花白棠梨間葉黃早寒風撼撼新霽月蒼蒼
園菜迎霜死庭蕪過雨荒簷空愁宿鷺壁闇思啼螿
眼爲看書損肱因運甕傷病骸渾似木老髮欲成霜
少睡知年長端憂覺夜長舊遊多廢忘往事偶思量
忽憶煙霄路常陪劍履行登朝思檢束入闕學趨蹌
命偶風雲會恩覃雨露霽沾枯發枝葉磨鈍起鋒鋌
崔閣連鑣驚錢兄接翼翔齊竽混韶夏燕石厠琳琅
同日升金馬分宵直未央共詞加寵命合表謝恩光

厩馬驕初跨天厨味始嘗朝晡頒餅餌寒暑賜衣裳
對秉鵝毛筆俱含鷄舌香青縑衾薄絮朱裏幕高張
晝食恒連案宵眠每並床差肩承詔旨連署進封章
起草偏同視疑文最共詳減私容點竄窮理折毫芒
便共輸肝膽何曾異肺腸慎微參石奮尖密學張湯
禁闥青交瑣官垣紫界牆井欄排齒齒簷瓦閭鴛鴦
樓額題鳩鵲池心浴鳳凰風枝萬年動溫樹四時芳
宿露疑金掌晨暉上璧璫砌筠塗綠粉庭果滴紅漿
曉從朝興慶春陪宴栢梁傳呼鞭索索拜舞珮鏘鏘
仙仗環雙闕神兵闕兩廂火翻紅尾旆冰卓白竿槍
滉漾經魚藻深沉近浴堂分庭皆命婦對面即儲皇
貴主冠浮動親王轡開裝金鈿相照耀朱紫間熒煌

毳簇桃花綺歌巡竹葉觴窪銀中貴帶昂黛內人粧
賜禊東城下頒酺曲水傍樽壘分聖酒妓樂借仙倡
淺酌看紅藥徐吟把綠楊宴迴過御陌行歇入僧房
白鹿原東郭青龍寺北廊望春花景暖避暑竹風涼
下直閒如社尋芳醉似狂有時還後到無處不相將
鷄鶴初雖雜蕭蘭久乃彰來燕隗貴重去魯孔恓惶
聚散期難定飛沉勢不常五年同晝夜一別似參商
屈折孤生竹銷摧百鍊鋼途窮任憔悴道在肯徬徨
尚念遺簪折仍憐病雀瘡卹寒分賜帛救餒減餘糧
藥物來盈裹書題寄滿箱殷勤翰林主珍重禮闈郎
煦沫誠多謝搏扶豈所望提携勞氣力吹簸不飛揚
拙秀才何用龍鍾分自當粧媠徒費黛磨甌詎成璋
習隱將時背干名與道妨外身宗老氏齊物學蒙莊
踈放遺千慮愚蒙守一方樂天無怨歎倚命不動勤
憤懣胸須豁交加臂莫攘珠沉猶是寶金躍未爲祥
泥尾休搖掉灰心罷激昂漸閒親道友因病事醫王
息亂歸禪定存神入坐亡斷癡求慧劍濟苦得慈航
不動爲吾志無何是我鄉可憐身與世從此兩相忘

酬盧秘書二十韻

時初奉詔除
贊善大夫

謬歷文場選慙非翰苑才雲霄高翥致毛羽弱先摧
識分忘軒冕知歸返草萊杜陵書積蠹豐獄劍生苔
晦厭鳴鷄雨春驚震鬣雷舊恩收墜履新律動寒灰
鳳詔容徐起鵷行許重陪衰顏雖拂拭蹇步尚徘徊
睡少鐘偏警行遲漏苦催風霜趁朝去雨雪拜陵迴

上感君猶念傍慙友或推石頑鑿費力女醜嫁勞媒
倏忽青春度奔波白石頽性將時共背病與老俱來
聞有蓬壺客知懷杞梓材世家標甲第官職滯麟臺
筆盡鉛黃點詩成錦繡堆嘗思豁雲霧忽喜訪塵埃
心爲論文合眉因勸善開不勝珍重意滿袖寫瓊環

題盧秘書夏日新栽竹二十韻

湘竹初封植盧生此考槃久持霜節苦新託露根難
等度須當砌踈稠要滿欄買憐分薄俸栽稱作閒官
葉剪藍羅碎莖抽玉琯端幾聲清浙瀝一簇綠檀欒
未夜青嵐入先秋白露團拂肩搖翡翠熨手弄琅玕
韻透窓風起陰鋪砌月殘炎天聞覺冷窄地見疑寬
梢動勝搖扇枝低好掛冠碧籠煙霧霧珠灑雨珊珊

晚籜晴雲展陰芽蟄虺蟠愛從抽馬策惜未截魚竿

松韻徒煩聽桃夭不足觀梁慙當家杏臺陋本司蘭

古詩云盧家蘭室杏爲梁又秘書府即蘭臺也撐撥詩人興勾牽酒客歡靜

連蘆簟滑涼拂葛衣單豈止消時暑應能保歲寒莫

同凡草木一種夏中看

渭村酬李二十見寄

百里音書何太遲暮秋把得暮春詩柳條綠日君相
憶梨葉紅時我始知莫歎學官貧冷落猶勝村客病
支離形容意緒遙看取不似華陽觀裏時

初授贊善大夫早朝寄李二十助教

病身初謁青宮日衰貌新垂白髮年寂寞曹司非熱
地蕭條風雪是寒天遠坊早起常侵鼓瘦馬行遲苦

費鞭一種共君官職冷不如猶得日高眠

欲與元八卜隣先有是贈

平生心迹最相親欲隱墻東不爲身明月好同三徑
夜綠楊宜作兩家春每因暫出猶思伴豈得安居不
擇隣何獨終身數相見子孫長作隔墻人

遊城南留元九李二十晚歸

老遊春飲莫相違不獨花稀人亦稀更勸殘杯看日
影猶應趁得鼓聲歸

廣宣上人以應制詩見示因以贈之詔許上

人居安國寺紅樓院以詩供奉

道林談論惠休詩一到人天便作師香積筵承紫泥
詔昭陽歌唱碧雲詞紅樓許住請銀鑰翠輦陪行謁

玉墀惆悵甘泉曾侍從與君前後不同時

重過秘書舊房因題長句

時爲贊善大夫

閣前下馬思徘徊第二房門手自開昔爲白面書郎
去今作蒼頭贊善來吏人不識多新補松竹相親是
舊栽應有題墻名姓在試將衫袖拂塵埃

重到城見元九七絕句

容貌一日減一日心情十分無九分每逢陌路猶嗟
嘆何況今朝是見君

高相宅

青苔故里懷恩地白髮新生抱病身涕淚雖多無哭
處永寧門館屬他人

張十八

諫垣幾見遷遺補憲府頻聞轉殿監獨有詠詩張太
祝十年不改舊官銜

劉家花

劉家墻上花還發李十門前草又春處處傷心心始
悟多情不及少情人

裴五

莫怪相逢無笑語感今思舊戟門前張家伯仲偏相
似每見青楊一惘然

仇家酒

年年老去歡情少處處春來感事深時到仇家非愛
酒醉時心勝醒時心

恒寂師

舊遊分散人零落如此傷心事幾條會逐禪師坐禪
去一時滅盡定中油

靖安北街贈李二十

榆莢拋錢柳展眉兩人並馬語行遲還似往年安福
寺共君私試却迴時

重傷小女子

學人言語憑牀行嫩似花房脆似瓊纔知恩愛迎三
歲未辯東西過一生汝異下場應殺禮吾非上聖詎
忘情傷心自歎鳩巢拙長墮春雛養不成

過顏處士墓

向墳通徑沒荒榛滿室詩書積闔壁長夜肯教黃壤
曉悲風不許白楊春簞瓢顏子生仍促布被黔婁死

更貧未會悠悠上天意惜將富壽與何人

題周皓大夫新亭子二十二韻

東道常為主南亭別待賓規模何日創景致一時新
廣砌羅紅藥疎窓蔭綠筠鑲開賓閣曉梯上妓樓春
置醴寧三爵加邊過八珍茶香飄紫筍膾縷落紅鱗
輝赫車輿開珍竒鳥獸馴獼猴看檻馬鸚鵡喚家人
錦額簾高捲銀花盞慢巡勸嘗光祿酒許看洛川神
周兼光祿卿有家妓數十人 歛翠凝歌黛流香動舞巾裙翻綉鷄
鵝梳陷鈿麒麟笛怨音含楚箏嬌語帶秦侍兒催畫
燭醉客吐文茵投轄多連夜鳴珂便達晨入朝紆紫
綬待漏擁朱輪貴介交三事光榮照四隣甘濃將奉
客穩煖不緣身十載歌鐘地三朝節鉞臣愛才心獨

儻敦舊禮殷勤門以招賢盛家因好事貧始知豪傑
意富貴為交親

賦得聽邊鴻

驚風吹起塞鴻群半拂平沙半入雲為問昭君月下
聽何如蘇武雪中聞

見楊弘貞詩賦因題絕句以自諭

賦句詩章妙入神末年三十即無身常嗟薄命形憔悴
若比弘貞是幸人

病中早春

今朝枕上覺頭輕強起墻前試脚行羶膩斷來無氣
力風痰惱得少心情煖銷霜瓦津初合寒減冰渠凍
不成唯有愁人髮間雪不隨春盡逐春生

送人貶信州判官

地僻山深古上饒土風貧薄道程遙不唯遷客須栖
屑見說居人也寂寥溪畔毒沙藏水弩城頭枯樹下
山魈若於此郡為卑吏刺史廳前又折腰

曲江醉後贈諸親故

郭東丘墓何年客江畔風光幾日春只合殷勤逐杯
酒不須踈索向交親中天或有長生藥下界應無不
死人除却醉來開口笑世間何事更關身

和元八侍御升平新居四絕句時方與元八卜隣

看花屋

忽驚映樹新開屋却似當簷故種花可惜年年紅似
火今春始得屬元家

累土山

堆土漸高山意出終南移入戶庭間玉峯藍水應惆
悵恐見新山望舊山元八舊居在藍田山

高亭

亭脊太高君莫拆東家留取當西山好看落日斜銜
處一片春嵐暎半環

松樹

白金換得青松樹君既先栽我不栽幸有西風易憑
仗夜深偷得好聲來

醉後却寄元九

蒲池村裏匆匆別澧水橋邊兀兀迴行到城門殘酒
醒萬重離恨一時來

重寄

蕭散弓驚鴈分飛，劍化龍悠悠。天地內不死，會相逢。

李十一舍人松園飲小酌，酒得元八侍御詩。

叙云在臺中推院有鞠獄之苦，即事書懷。

因酬四韻

愛酒舍人開小酌，能文御史寄新詩。亂松園裡醉相

憶，古栢廳前忙不知。早夏我當逃暑日，晚衙君是慮

囚時。唯應清夜無公事，新草亭中好一期。元於升平宅立草亭

重到華陽觀舊居

憶昔初年三十二，當時秋思已難堪。若為重入華陽

院，病髮愁心四十三。

荅勸酒

莫怪近來都不飲，幾迴因醉却沾巾。誰料平生狂酒

客，如今變作酒悲人。

題王侍御池亭

朱門深鎖春池滿，岸落薔薇水浸莎。畢竟林塘誰是

主，主人來少客來多。

聽水部吳員外新詩，因贈絕句

朱紱仙郎白雪歌，和人雖少愛人多。明朝說向詩家

道，水部如今不姓何。

雨夜憶元九

天陰一日便堪愁，何況連宵雨不休。一種雨中君最

苦，編梁閣道向通州。

雨中携元九詩訪元八侍御

微之詩卷憶同開暇日多應不入臺好句無人堪共
詠衝泥蹋水就君來

贈楊秘書巨源

楊嘗有贈洛州詩云三刀夢益州一箭取遼城由是知名

早聞一箭取遼城相識雖新有故情清句三朝誰是
敵白鬚四海半為兄貧家薙草時時入瘦馬尋花處
處行不用更教詩過好折君官職是聲名

和武相公感韋令公舊池孔雀

同用深字

索寞少顏色池邊無主禽難收帶泥翅易結著人心
頂毳落殘碧尾花銷闇金放歸飛不得雲海故巢深
寄生衣與微之因題封上

淺色縠紗輕似霧紡花紗袴薄如雲莫嫌輕薄但知
著猶恐通州熱殺君

白牡丹

白花冷淡無人愛亦占芳名道牡丹應似東官白替
善被人還喚作朝官

夢舊

別來老大苦修道鍊得離心成死灰平生憶念消磨
盡昨夜因何入夢來

戲題盧秘書新移薔薇

風動翠條腰嫋嫋露垂紅萼淚闌干移他到此須為
主不愛花人莫使看

曲江夜歸聞元八見訪

自入臺來見面稀班中遙得揖容輝早知相憶來相
訪悔待江頭明月歸

苦熱題恒寂師禪室

人人避暑走如狂，獨有禪師不出房。可是禪房無熱到，但能心靜即身涼。

微之到通州日授館未安，見塵壁間有數行字，讀之即僕舊詩。其落句云：綠水紅蓮一朶開，千花百草無顏色。然不知題者何人，也。微之吟歎不足，因綴一章，兼錄僕詩本同寄省。其詩乃是十五年前初及第時贈長安妓人阿軟絕句。緬思往事，杳若夢中懷舊感，今因酬長句。

十五年前似夢遊，曾將詩句結風流。偶助笑歌嘲阿軟，可知傳誦到通州。昔教紅袖佳人唱，今遣青衫司

馬愁惆悵，又聞題處所。雨淋江館破牆頭。

得微之到官後書，備知通州之事，悵然有感，因成四章。

來書子細說通州，州在山根峽岸頭。四面千重火雲合，中心一道瘴江流。蟲蛇白晝攔官道，蚊蚋黃昏撲郡樓。何罪遣君居此地，天高無處問來由。

二

匳匝巔山萬仞餘，人家應似甌中居。寅年籬下多逢虎，亥日沙頭始賣魚。衣斑梅雨長須熨，米澁畝田不解鉏。努力安心過三考，已曾愁殺李尚書。

李實尚書先貶此州

身歿於彼處

三

人稀地僻醫巫少夏旱秋霖瘴瘥多老去一身須愛
惜別來四體得如何侏儒飽笑東方朔蕙苴讒憂馬
伏波莫遣沈愁結成病時時一唱濯纓歌

四

通州海內恓惶地司馬人間冗長官傷鳥有弦驚不
定卧龍無水動應難劔埋獄底誰深掘松偃霜中盡
冷看舉目爭能不惆悵高車大馬滿長安

病中答招飲者

顧我鏡中悲白髮儘君花下醉青春不緣眼痛兼身
病可是樽前第二人

鷺子樓三首并序

徐州故尚書張有愛妓曰眇眇善歌舞雅多風態予

爲校書郎時遊徐泗間張尚書宴予酒酣出眇眇以
佐歡歡甚予因贈詩云醉嬌勝不得風媚牡丹花盡
歡而去邇後絕不相聞迨茲僅一紀矣昨日司勳真
外郎張仲素績之訪予因吟新詩有燕子樓三首詞
甚婉麗詰其由爲眇眇作也績之從事武寧軍累年
頗知眇眇始末云尚書旣沒歸葬東洛而彭城有張
氏舊第第中有小樓名燕子眇眇念舊愛而不嫁居
是樓十餘年幽獨塊然于今尚在予愛績之新詠感
彭城舊遊因同其題作三絕句

滿窓明月滿簾霜被冷燈殘拂卧床燕子樓中霜月
夜秋來只爲一人長

二

鈿暈羅衫色似烟幾回欲著即潜然自從不舞霓裳
曲疊在空箱十一年

三

今春有客洛陽回曾到尚書墓上來見說白楊堪作
柱爭教紅粉不成灰

初貶官過望秦嶺自此後詩江州路上作

草草辭家憂後事遲遲去國問前途望秦嶺上回頭
立無限秋風吹白鬚

藍橋驛見元九詩詩中云江陵歸時逢春雪

藍橋春雪君歸日秦嶺秋風我去時每到驛亭先下
馬循墻遶柱覓君詩

韓公堆寄元九

韓公堆北澗西頭冷雨涼風拂面秋努力南行少惆
悵江州猶似勝通州

發商州

商州館裡停三日待得妻孥相逐行若比李三猶自
勝兒啼婦哭不聞聲

武關南見元九題山石榴花見寄

往來同路不同時前後相思兩不知行過關門三四
里榴花不見見君詩

紅鸚鵡商山路逢

安南遠進紅鸚鵡色似桃花語似人文章辯慧皆如
此籠檻何年出得身

題四皓廟

卧迹秦亂起安劉舒卷如雲得自由若有精靈應笑
我不成一事謫江州

罷藥

自學坐禪休服藥從他時復病沉沉此身不要全強
健強健多生人我心

白鷺

人生四十未全衰我爲愁多白髮垂何故水邊雙白
鷺無愁頭上亦垂絲

襄陽舟中

下馬襄陽郭移舟漢陰驛秋風截江起寒浪連天白
本是多愁人復此風波夕

江夜舟行

烟澹月濛濛舟行夜色中江鋪滿槽水帆展半檣風
叫曙嗷嗷鴈啼秋唧唧蟲只應催北客早作白鬚翁

紅藤杖

交親過滄別車馬到江迴唯有紅藤杖相隨萬里來
江上吟元八絕句

大江深處月明時一夜吟君小律詩應有水仙潛出
聽翻將唱作步虛詞

途中感秋

節物行搖落年顏坐變衰樹初黃葉日人欲白頭時
鄉國程程遠親朋處處辭唯憐病與老一步不相離

登郢州白雪樓

白雪樓中一望鄉青山簇簇水茫茫朝來渡口逢京

使說道烟塵近洛陽

時淮西寇未平

舟夜贈內

三聲猿後垂鄉淚一葉舟中載病身莫凭水窓南北望月明月闌揔愁人

逢舊

我梳白髮添新恨君掃青蛾減舊容應被傍人怪惆悵少年離別老相逢

白口阻風十日

洪濤白浪塞江津處處迴事事迤世上方為失途客江頭又作阻風人魚鰕遇雨腥盈鼻蚊蚋和烟癢滿身老大光陰能幾日等閒白口坐經旬

浦中夜泊

闌上江隄還獨立水風霜氣夜稜稜回看深浦停舟處蘆荻花中一點燈

盧侍御與崔評事為予於黃鶴樓致宴宴罷

同望

江邊黃鶴古時樓勞致華筵待我遊楚思森茫雲水冷商聲清脆管絃秋白花浪濺頭陀寺紅葉林籠鷓鴣洲揔是平生未行處醉來堪賞醒堪愁

舟中讀元九詩

把君詩卷燈前讀詩盡燈殘天未明眼痛滅燈猶闔坐逆風吹浪打船聲

舟行阻風寄李十一舍人

扁舟厭泊烟波上輕策閒尋浦嶼間虎蹋青泥稠似

印風吹白浪大於山且愁江郡何時到敢望京都幾
歲還今日料君朝退後迎寒新耐煖開顏

李好小酌
酒故云

雨中題衰柳

濕屈青條折寒飄黃葉多不知秋雨意更遣欲何如

題王處士郊居

半依雲渚半依山愛此令人不欲還負郭田園八九
頃向陽茅屋兩三間寒松縱老風標在野鶴雖饑飲
啄閒一臥江村來早晚著書盈帙鬢毛斑

歲晚旅望

朝來暮去星霜換陰慘陽舒氣序牽萬物秋霜能壞
色四時冬日最凋年烟波半露新沙地鳥雀群飛欲
雪天向晚蒼蒼南北望窮陰離思兩無邊

晏坐閒吟

昔爲京洛聲華客今作江湖潦倒翁意氣銷磨群動
裡形骸變化百年中霜侵殘鬢無多黑酒伴衰顏只
斲紅賴學禪明非想定千愁萬念一時空

題李山人

厨無烟火室無妻籬落蕭條屋舍低每日將何療飢
渴井華雲粉一刀圭

讀莊子

去國辭家謫異方中心自怪少憂傷爲尋莊子知歸
處認得無何是本鄉

江樓偶宴贈同座

南浦閒行罷西樓小宴時望湖凭檻久待月放杯遲

江果嘗盧橘山歌聽竹枝相逢且同樂何必舊相知

放言五首序

元九在江陵時有放言長句詩五首韻高而體律意古而詞新予每詠之甚覺有味雖前輩深於詩者未有此作唯李頎有云濟水至清河自濁周公大聖接輿狂斯句近之矣予出佐潯陽未屆所任舟中多暇又江上獨吟因綴五篇以續其意耳

朝真暮偽何人辯古往今來底事無但愛莊生能詐聖可知甯子解佯愚草螢有耀終非火荷露雖團豈定珠不取燔柴兼照乘可憐光彩亦何殊

二

世途倚伏都無定塵網牽纏卒未休禍福迴還車轉

轂榮枯反覆手藏鉤龜靈未免剝腸患馬失應無折足憂不信君看奕棋者輸贏須待局終頭

三

贈君一法決狐疑不用鑽龜與祝著試玉要燒三日

滿真玉燒三日不熱辨材須待七年期豫章木生七年而後知周公恐

懼流言日王莽謙恭未篡時向使當時身便死一生真偽復誰知

四

誰家第宅成還破何處親賓哭復歌昨日屋頭堪炙手今朝門外好張羅北邙未省留閒地東海何曾有定波莫笑賤貧誇富貴共成枯骨兩如何

五

泰山不要欺毫末
顏子無心羨老彭
松樹千年終是朽
槿花一日自為榮
何須戀世常憂死
亦莫嫌身漫厭生
生去死來都是幻
幻人哀樂繫何情

歲暮道情二首

壯日苦曾驚歲月
長年都不惜光陰
為學空門平等法
先齊老少死生心

二

半故青衫半白頭
雪風吹面上江樓
禪功自見無人覺
合是愁時亦不愁

讀李杜詩集因題卷後

翰林江左日
負外劔南時
不得高官職
仍逢苦亂離
暮年通客恨
浮世謫仙悲
吟詠流千古
聲名動四夷

文場供秀句
樂府待新辭
天意君須會
人間要好詩

賀鑑知章目李
白為謫仙人

強酒

若不坐禪銷妄想
即須吟醉放狂歌
不然秋月春風夜
爭那閒思往事何

獨樹浦雨夜寄李六郎中

忽憶兩家同里巷
何曾一處不追隨
閒遊預筭分朝日
靜語多同待漏時
花下放狂衝黑飲
燈前起坐徹明棋
可知風雨孤舟夜
蘆葦叢中作此詩

聽崔七妓人箏

花臉雲鬟坐玉樓
十三絃裡一時愁
憑君向道休彈白
盡江州司馬頭

望江州

江迴望見雙華表知是潯陽西郭門猶去孤舟三四
里水烟沙雨欲黃昏

初到江州

潯陽欲到思無窮庾亮樓南湓口東樹木凋疎山雨
後人家低濕水烟中菰蔣餒馬行無力蘆荻編房臥
有風遙見朱輪來出郭相迎勞動使君公

醉後題李馬二妓

行搖雲髻花鈿節應似霓裳趁管絃艷動舞裙渾是
火愁凝歌黛欲生烟有風縱道能迴雪無水何由忽
吐蓮疑是兩般心未決雨中神女月中仙

盧侍御小妓乞詩座上留贈

鬱金香汗裛歌巾山石榴花染舞裙好似文君還對
酒勝於神女不歸雲夢中那及覺時見宋玉荆王應
羨君

白氏文集卷第十五

白氏文集卷第十六

律詩

五言七言自
一百韻凡一

四言

東南行一百韻寄通州元九侍御豐州李十

一舍人果州崔二十二使君開州韋大貲

外庾三十二補闕杜十四拾遺李二十助

教員外竇七校書

南去經三楚東來過五湖山頭看候館水面問征途
地遠窮江界天低極海隅飄零同落葉浩蕩似乘桴
漸覺鄉原異深知土產殊夷音語嘲哂蠻態笑睢盱
水市通闐闐烟村混舳舻吏徵魚戶稅人納火田租
亥日饒鰕蟹寅年足虎貙成人男作非似鬼女為巫
樓閣攢猖婦隄喧簇貶夫夜船論鋪賃春酒斷甌沽

見果多盧橘聞禽悉鷓鴣山歌猿獨叫野哭鳥相呼
嶺微雲成棧江郊水當郭月橋翹柱鶴風汎鮎檣烏
鼇礙潮無信蛟驚浪不虞鼉鳴泉窟室屢結氣浮圖
樹裂山魃穴沙含水弩樞喘牛犁紫芋羸馬放青菘
繡面誰家婢鵝頭幾歲奴泥中採菱芡燒後拾樵蘇
鼎膩愁烹鼈盤腥厭膾鱸鐘儀徒戀楚張翰浪思吳
氣序涼還熱光陰旦復晡身方逐萍梗年欲近桑榆
渭北田園廢江西歲月徂憶歸恒慘澹懷舊忽踟躕
自念咸秦客嘗爲鄒魯儒蘊藏經國術輕棄度關繻
賦力凌鸚鵡詞鋒敵轆轤戰文重掉鞅射策一彎弧
崔杜鞭齊下元韋轡並驅名聲逼揚馬交分過蕭朱
世務輕磨揣周行竊覬覦風雲皆會合雨露各霑濡

共偶昇平代偏慙固陋軀承明連夜直建禮拂晨趨
美服頒王府珍羞降御廚議高通白虎諫切伏青蒲
栢殿行陪宴花樓走看醺神旗張鳥獸天籟動笙竽
九劍星芒耀魚龍電策駢定場排漢旅促坐進吳歛
縹緲疑仙樂嬋娟勝畫圖歌鬟低翠羽舞汗墮紅珠
別選閒遊伴潛招小飲徒一杯愁已破三盞氣彌麤
軟美仇家酒幽閒葛氏姝十千方得斗二八正當壚
論笑杓胡律談憐鞏囁嚅李酣猶短實庾醉更蕪迂
案馬呼教住骰盤喝遣輸長驅波卷白連擲采成盧
聖盤卷白波莫走籌併頻逃席航嚴列置盂滿卮那
教馬皆當時酒令可灌頰玉不勝扶入視中樞草歸乘內廐駒醉曾衝
宰相驕不揖金吾日近恩雖重雲高勢却孤翻身落

霄漢失脚倒泥塗博望移門籍潯陽佐郡符予自太

大夫出為時情變寒暑世利算錙銖即日辭雙闕明

朝別九衢播遷分郡國次第出京都十年春微之移

予出佐潯陽明年冬杪秦嶺馳三驛商

山上二邗南山險道中岷陽亭寂寞夏口路崎嶇大

道全生棘中丁盡執爨江關未徹警淮寇尚稽誅時

西未平路經襄郡林對東西寺山分大小姑東林西

廬山北太姑小姑在廬峯蓮刻削湓浦帶縈紆蓮花

廬山南彭蠡湖中九派吞青草潯陽江

廬山北湓水在江城南何詩

鳴鳴春色辭門柳秋聲到井梧殘芳悲鷓鴣音啼失

暮節感茱萸藥拆金英菊花飄雪片蘆波紅日斜沒

沙白月平鋪幾見林抽笋頻驚燕引雛歲華何倏忽

年少不須更眇默思千古蒼茫想八區孔窮緣底事

顏天有何辜龍智猶經醢龜靈未免剝窮通應已定

聖哲不能逾況我身謀拙逢他厄運拘漂流隨大海

鎚鍛任洪爐險阻嘗之矣栖遲命也夫沈冥消意氣

窮餓耗肌膚防瘴和殘藥迎寒補舊襦書牀鳴蟋蟀

琴匣網踟躕貧室如懸磬端憂劇守株時遭人指點

數被鬼揶揄兀兀都疑夢昏昏半是愚女驚朝不起

妻怪夜長吁萬里拋朋侶三年隔友于自然悲聚散

不是恨榮枯去夏微之廬今春席八殂天涯書達否

泉下哭知無去年問元九瘡書去竟未報今春謾寫

因愁減衰容與病俱相逢應不識滿領白髭鬚

謫居

面瘦頭班四十四遠謫江州爲郡吏逢時棄置從不
才未老衰羸爲何事火燒寒澗松爲燼霜降春林花
委地遭時榮悴一時間豈是昭昭上天意

初到江州寄翰林張李杜三學士

早攀霄漢上天衢晚落風波委世途雨露施恩無厚
薄蓬蒿隨分有榮枯傷禽側翅驚弓箭老婦低顏事
舅姑碧落三仙曾識百年深記得姓名無

庾樓曉望

獨憑朱檻立凌晨山色初明水色新竹霧曉籠銜嶺
月蘋風煖送過江春子城陰處猶殘雪衙鼓聲前

有塵三百年來庾樓上曾經多少望鄉人

宿西林寺

木落天晴山翠開愛山騎馬入山來心知不及柴桑

令一宿西林便欲回

柴桑令鑿遺民是也

江樓宴別

樓中別曲催離酌燈下紅裙間綠袍縹緲楚風羅綺
薄錚鏦調管絃高寒流帶月澄如鏡夕吹和霜利
似刀樽酒未空歡未盡舞腰歌袖莫辭勞

題山石榴花

一叢千朶壓欄干剪碎紅銷却作團風嫋舞腰香不
盡露銷粧臉淚新乾薔薇帶刺攀應懶齒齒生泥翫
亦難爭及此花簷戶下任人採弄盡人看

代春贈

山吐晴峰水放光
辛夷花白柳梢黃
但知莫作江西意
風景何曾異帝鄉

荅春

草烟低重水花明
從道風光似帝京
其柰山猿江上叫
故鄉無此斷腸聲

櫻桃花下嘆白髮

逐處花皆好
隨年貌自衰
紅櫻滿眼日
白髮半頭時
倚樹無言久
攀條欲放遲
臨風兩堪嘆
如雪復如絲
惜落花贈崔二十四

漠漠紛紛不柰何
狂風急雨兩相和
晚來悵望君知否
枝上稀疎地上多

移山櫻桃

亦知官舍非吾宅
且斲山櫻滿院栽
上佐近來多五考
少應四度見花開

官舍閒題

職散優閒地
身慵老大時
送春唯有酒
銷日不過茶
祿米麿牙稻
園蔬鴨脚葵
飽食晨晏起
餘暇弄龜兒

龜兒即小姪名

晚春登大雲寺南樓贈常禪師

花盡頭新白
登樓意若何
歲時春日少
世界苦人多
愁醉非因酒
悲吟不是歌
求師治此病
唯勸讀楞伽
北樓送客歸上都

憑高眺遠一悽悽
却下朱欄手共攜
京路人歸天直

北江樓客散日平西長津欲渡迴船尾殘酒重傾簇
馬蹄不獨別君須強飲窮愁自要醉如泥

北亭招客

踈散郡丞同野客幽閒官舍抵山家春風北戶千莖
竹晚日東園一樹花小盞吹醅嘗冷酒深爐敲火炙
新茶能來盡日觀棊否太守知慵放晚衙

宿西林寺早起東林滿上人之會因寄崔二

十二頁外

謫辭魏闕鷓鴣隔老入廬山麋鹿隨薄暮蕭條投寺
宿凌晨清淨與僧期雙林我起聞鐘後隻日君趨入
閣時鵬鷄高低分皆定莫勞心力遠相思

遊寶稱寺

竹寺初晴日花塘欲晚春野猿疑弄客山鳥侶呼人
酒嫩傾金液茶新碾玉塵可憐幽靜地堪寄老慵身
早春聞提壺鳥因題鄰家

厭聽秋猿催下淚喜聞春鳥勸提壺誰家紅對先花
發何處青樓有酒沽進士龕豪尋靜盡拾遺風彩近
都無欲期明日東林醉變作騰騰一俗夫

見紫薇花憶微之

一叢暗澹將何比淺碧籠裙襯紫巾除却微之見應
愛人間少有別花人

薔薇花一叢獨死不知其故因有是篇

柯條未嘗損根發不曾移同類今齊茂孤芳忽獨萎
仍憐委地日正是帶花時碎碧初凋葉焦紅尚戀枝

乾坤無厚薄草木自榮衰欲問因何事春風亦不知
湖亭望水

久雨南湖漲新晴北客過日沉紅有影風定綠無波
岼沒閭閻少灘平船舫多可憐心賞處其奈獨遊何

閒遊

外事因慵廢中懷與靜期尋泉上山遠看筍出林遲
白石磨樵斧青竿理釣絲澄清深淺好最愛夕陽時

憶微之傷仲遠

李三仲遠
去年春喪

幽獨辭群久漂流去國賒只將琴作伴唯以酒爲家
感逝因看水傷離爲見花李三埋地底元九謫天涯
舉眼青雲遠回頭白日斜可能勝賈誼猶自滯長沙

過鄭處士

聞道移居村塢間竹林多處獨開關故來不是求仙
事暫借南亭一望山

霖雨苦多江湖暴漲塊然獨望因題北亭

自作潯陽客無如苦雨何陰昏晴日少間悶蹙時多
湖闊將天合雲低與水和籬根舟子語巷口釣人歌
霧鳥沉黃氣風帆楚白波門前車馬道一宿變江湖

春末夏初閒遊江郭二首

閒出乘輕屐徐行蹋軟沙觀魚傍溢浦看竹入楊家

溢浦多魚浦西有楊侍郎宅多好竹林迸穿籬筍藤飄落水花雨埋釣

舟小風颺酒旗斜嫩剥青菱角濃煎白茗茶淹留不
知夕城對欲栖鷗

柳影繁初合鶯聲澁漸稀早梅迎夏結殘絮送春飛
西日韶光盡南風暑氣微展張新小簟熨帖舊生衣
綠蟻杯香嫩紅絲鱸縷肥故園無此味何必苦思歸

紅藤杖杖出南蠻

南詔紅藤杖西江白首人時時携步月處處把尋春
勁健孤莖直踈圓六節勻火山生處遠瀘水洗來新
粗細纔盈手高低僅過身天邊望鄉客何日拄歸秦
風雨中尋李十一因題船上

匹馬來郊外扁舟在水濱可憐衝雨客來訪阻風人
小醯沽清醕行厨煮白鱗停杯看柳色各憶故園春
題廬山山下湯泉

一眼湯泉流向東浸泥澆草煖無功驪山溫水因何

事流入金鋪玉甃中

寄蘄州箏與元九因題六韻時元九
錕居

笛竹出蘄春霜刀劈翠筠織成雙鎖箏寄與獨眠人
卷作筒中布舒爲席上玓滑如鋪薤葉冷似卧龍鱗
清潤宜乘露鮮華不受塵通州炎瘴地此物最關身

秋熱

西江風候接南威暑氣常多秋氣微猶道江州最涼
冷至今九月著生衣

題元八溪居

溪嵐漠漠對重重水檻山牕次第逢晚葉尚開紅躑
躅秋房初結白芙蓉聲來枕上千年鶴影落杯中五
老峰更媿殷勤留客意魚鮮飯細酒香濃

晚出西郊

散吏閒如客貧州冷似村早涼湖北岫殘照郭西門
嬾鑷從鬚白休醫任眼昏老來何所用少與不多言
階下蓮

葉展影翻當砌月花開香散入簾風不如種在天池
上猶勝生於野水中

端居詠懷

賈生俟罪心相似張翰思歸事不如斜日早知驚鵬
鳥秋風悔不憶鱸魚胸襟曾貯匡時策懷袖猶殘諫
獵書從此萬緣都擺落欲攜妻子買山居

夜宿江浦聞元八改官因寄此詩

君遊丹陛已三遷我汎滄浪欲二年
劍佩曉趨雙鳳

關烟波夜宿一漁船交親盡在青雲上鄉國遙拋白

日邊若報生涯應笑殺結茅栽芋種畬田

百花亭

朱檻在空虛涼風八月初山形如峴首江色似桐廬
佛寺乘船入人家枕水居高亭仍有月今夜宿何如

江樓早秋

南國雖多熱秋來亦不遲湖光朝霽後竹氣晚涼時
樓閣宜佳客江山入好詩清風水蘋葉白露木蘭枝
欲作雲泉計須營伏臘資匡廬一步地官滿更何之

送客之湖南

年年漸見南方物事事堪傷北客情山鬼趨跳唯一
足峽猿哀怨過三聲帆開青草湖中去衣濕黃梅雨

裡行別後雙魚難定寄近來潮不到湓城

百花亭晚望夜歸

百花亭上晚徘徊雲影陰晴掩復開日色悠揚映山
盡雨聲蕭颯渡江來髮毛遇病雙如雪心緒逢秋一
似灰向夜欲歸愁未了滿湖明月小船迴

西樓

小郡大江邊危樓夕照前青蕪卑濕地白露次寥天
鄉國此時阻家書何處傳仍聞陳蔡戍轉戰已三年
尋李道士山居兼呈元明府

盡日行還歇遲遲獨上山攀藤老筋力照水病容顏
陶巷招居住茅家許往還飽諳榮辱事無意戀人間
四十五

行年四十五兩鬢半蒼蒼清瘦詩成癡粗豪酒放狂
老來猶委命安處即爲鄉或擬廬山下來春結草堂
寄李相公崔侍郎錢舍人

曾陪鶴馭兩三仙親侍龍輿四五年天上歡華春有
限世間漂泊海無邊榮枯事過都成夢憂喜心忘便
是禪官滿更歸何處去香爐峰在宅門前

廳前桂

天台嶺上凌霜對司馬廳前委地叢一種不生明月
山中猶校勝塵中

尋王道士藥堂因有題贈

行行覓路緣松嶠步步尋花到杏壇白石先生小有
洞黃芽姹女大還丹常悲東郭千家塚欲乞西山五

色丸但恐長生須有籍仙臺試爲檢名看

秋晚

籬菊花稀砌桐落對陰離離日色薄單幕疎簾貧寂
寞涼風冷露秋蕭索光陰流轉忽已晚顏色凋殘不
如昨 妻臥病月明時不搗寒衣空搗藥

南浦歲暮對酒送王十五歸京

臘後水生覆溢水夜來雲闇失廬山風飄細雪落如
米索索蕭蕭蘆葦間此地二年留我住今朝一酌送
君還相看漸老無過醉聚散窮通揔是閒

除夜

薄晚支頤坐中宵枕臂眠一從身去國再見日周天
老度江南歲春拋渭北田潯陽來早晚明日是三年

聞李十一出牧澧州崔二十二出牧果州因

寄絕句

平生相見即眉開靜念無如李與崔各是天涯爲刺
史緣何不覓九江來

元和十三年淮寇未平詔停歲仗憤然有感

率爾成章

聞停歲仗軫皇情應爲淮西寇未平不分氣從歌裡
發無明心向酒中生愚計忽思飛短檄狂心便欲請
長纓從來妄動多如此自笑何曾得事成

庾樓新歲

歲時銷旅貌風景觸鄉愁牢落江湖意新年上庾樓

上香爐峰

倚石攀蘿歇病身青筇竹杖白紗巾他時畫出廬山障便是香爐峰上人

憶微之

與君何日出屯蒙魚戀江湖鳥厭籠分手各拋滄海畔折腰俱老綠衫中三年隔闊音塵斷兩地飄零氣味同又被新年勸相憶柳條黃軟欲春風

雨夜贈元十八

卑濕沙頭宅連陰雨夜天共聽簷溜滴心事兩悠然把酒循環飲移牀曲尺眠莫言非故舊相識已三年

寒食江畔

草香沙暖水雲晴風景令人憶帝京還似往年春氣味不宜今日病心情聞鶯對下沈吟立信馬江頭取

次行忽見紫桐花悵望下邳明日是清明

三月三日登庾樓寄三十二

三日歡遊辭曲水二年愁卧在長沙每登高處長相憶何況茲樓屬庾家

聞李六景儉自河東令授唐鄧行軍司馬以詩賀之

誰能淮上靜風波聞道河東應此科不獨文詞供奉記定將談笑解兵戈泥埋劒戟終難久水借蛟龍何在多四十著緋軍司馬男兒官職未蹉跎

石楠樹

可怜顏色好陰涼葉剪紅殘花撲霜傘蓋低垂金翡翠
翠薰籠亂搭繡衣裳春芽細炷千燈焰夏藥濃焚百

和香見說上林無此對只教桃柳占年芳柳一作李

大林寺桃花

人間四月芳菲盡山寺桃花始盛開長恨春歸無覓處不知轉入此中來

詠懷

自從委任順浮沉漸覺年多功用深面上減除憂喜色胸中消盡是非心妻兒不問唯耽酒冠帶皆慵只抱琴長笑靈均不知命江離叢畔苦悲吟

早發楚城驛

過雨塵埃滅沿江道徑平月乘殘夜出人趁早涼行寂歷間唵動冥濛闇思生荷塘翻露氣稻壟瀉泉聲宿犬聞鈴起栖禽見火驚隴隴烟樹色十里始天明

箬峴東池

箬峴亭東有小池早荷新荇綠參差中霄把火行人發驚起雙棲白鷺鷥

建昌江

建昌江水縣門前立馬教人喚渡船忽似往年歸棹渡草風沙雨渭河邊

哭從弟

傷心一尉便終身叔母年高新婦貧一片綠衫消不得腰金拖紫是何人

香爐峰下新卜山居草堂初成偶題東壁五首

五架三間新草堂石堦桂柱竹編牆南簷納日冬天

煖北戶迎風夏月涼
灑砌飛泉纔有點拂
窓斜竹不成行
來春更葺東廂屋
紙閣蘆簾著孟光

二

喜入山林初息影
厭趨朝市久勞生
早年薄有烟霞志
歲晚深諳世俗情
已許虎溪雲裡臥
不爭龍尾道前行
從茲耳界應清淨
免見啾啾毀譽聲

三

長松對下小谿頭
斑鹿胎巾白布裘
藥圃茶園爲產業
野麋林鶴是交遊
雲生澗戶衣裳潤
嵐隱山厨火燭幽
最愛一泉新引得
清泠屈曲遶階流

四

日高睡足猶慵起
小閣重衾不怕寒
遺愛寺泉欹枕聽
香爐峰雪撥簾看
匡廬便是逃名地
司馬仍爲老官心
泰身寧是歸處
故鄉何獨在長安

五

宦途自此心長別
世事從今口不言
豈止形骸同土木
兼將壽夭任乾坤
胸中壯氣猶須遣
身外浮雲何足論
還有一條遺恨事
高家門館未酬恩

山中問月

爲問長安月誰教不暫離
昔隨飛蓋處今照入山時
借助秋懷曠留連
夜臥遲如歸舊鄉
國侶對好親知
松下行爲伴谿頭
坐有期千巖將萬壑
無處不相隨
正月十五日夜東林寺學禪偶懷藍田楊主

簿因呈智禪師

新年三五東林夕星漢迢迢鍾梵遲花縣當君行樂
夜松房是我坐禪時忽看月滿還相憶始嘆春來自
不知不覺定中微念起明朝更問鴈門師

臨水坐

昔爲東掖垣中客今作西方社內人
手把楊枝臨水坐閒思往事似前身

山居

山齋方獨往塵事莫相仍
藍輿辭鞍馬緇徒換友朋
朝食唯藥菜夜伴只紗燈
除却青衫在其餘便是僧
遺愛寺

弄石臨溪坐尋花遶寺行
時時聞鳥語處處是泉聲
山中與元九書因題書後

憶昔封書與君夜金鑿殿後欲明天
今夜封書在何處廬山菴裡晚燈前
籠烏檻猿俱未死人間相見是何年

黃石巖下作

久別鵝鸞侶深隨鳥獸羣
教他遠親故何處覓知聞
昔日青雲意今移向白雲

戲贈李十三判官

垂鞭相送醉醺醺遙見廬山指侶君
想君初覺從軍樂未愛香爐峰上人

醉中戲贈鄭使君

時使君先歸留妓樂重飲

密座移紅毯酡顏照綠杯
雙娥留且住五馬任先迴
醉耳歌催醒愁眉笑引開
平生少年與臨老斲重來

江亭夕望

憑高望遠思悠悠，晚上江亭夜未迴。
日欲沒時紅浪沸，月初生處白烟開。
辭枝雪盡將春去，滿鑷霜毛送老來。
爭敢三年作歸計，心知不及賈生才。

酬元貞外三月三十日慈恩寺相憶見寄

悵望慈恩三月盡，紫桐花落鳥關關。
誠知曲水春相憶，其柰長沙老未還。
赤嶺猿聲催白首，黃茅瘴色換朱顏。
誰言南國無霜雪，盡在愁人鬢髮間。

偶然二首

楚懷邪亂靈均直，放棄合宜何惻惻。
漢文明聖賈生賢，謫向長沙堪嘆息。
人事多端何足怪，天文至信猶差忒。
月離于畢合，霧靄有時不雨誰能測。

二

火發城頭魚水裏，救火竭池魚失水。
乖龍藏在牛領中，雷擊龍來牛枉死。
人道著神龜骨靈，試卜魚牛那至此。
六十四卦七十鑽，畢竟不能知所以。

中秋月

萬里清光不可思，添愁益恨遶天涯。
誰人隴外久征戍，何處庭前新別離。
失寵故姬歸院夜，沒蕃老將上樓時。
照他幾許人腸斷，玉兔銀蟾遠不知。

謝李六郎中寄新蜀茶

故情周匝向交親，新茗分張及病身。
紅紙一封書後信，綠芽十片火前春。
湯添勺水煎魚眼，末下刀圭攪麴塵。
不寄他人先寄我，應緣我是別茶人。

攜諸山客同上香爐峰遇雨而還沾濡狼籍
互相笑謔題此解嘲

蕭灑登山去龍鍾遇雨回磴危攀薜荔石滑踐莓苔
襪汗君相謔鞋穿我自咍莫欺泥土脚曾踏玉階來

彭蠡湖晚歸

彭蠡湖天晚桃花水氣春鳥飛千白點日沒半紅輪
何必爲遷客無勞是病身但來臨此望少有不愁人

酬贈李鍊師見招

幾年司諫直承明今日求真禮上清曾犯龍鱗容不
死欲騎鶴背覓長生劉綱有婦仙同得伯道無兒累
更輕若許移家相近任便驅雞犬上層城

西河雨夜送客

雲黑雨條條江昏水暗流有風催解纜無月伴登舟
酒罷無多興帆開不少留唯看一點火遙認是行舟

登西樓憶行簡

每因樓上西南望始覺人間道路長礙日暮山青簇
簇浸天秋水白茫茫風波不見三年面書信難傳萬
里腸早晚東歸來下峽穩乘船舫過瞿唐

羅子

有女名羅子生來纔兩春我今年已長日夜二毛新
顧念嬌啼面思量老病身直應頭似雪始得見成人

讀靈徹詩

東林寺裡西廊下石片鐫題數首詩言句怪來還校
別看名知是老湯師

聽李士良琵琶

人各賦二
十八字

聲似胡兒彈舌語愁如塞月恨邊雲間人暫聽猶眉
歛可使和蕃公主聞

昭君怨

明妃風貌最娉婷合在椒房應四星只得當年備宮
掖何曾專夜奉幃屏見踈從道迷圖畫知屈那教配
虜庭自是君恩薄如紙不須一向恨丹青

一作命甲
如紙薄

閒吟

自從苦學空門法銷盡平生種種心唯有詩魔降未
得每逢風月一閒吟

戲問山石榴

小對山榴近砌栽半含紅萼帶花來爭知司馬夫人

妬移到庭前便不開

編集拙詩成一十五卷因題卷末戲贈元九

李二十

一篇長恨有風情十首秦吟近正聲每被老元偷格

律

元九向江陵日嘗以拙
詩一軸贈行自後格變

苦教短李伏歌行

李二十
常自負


歌行近見予樂府
五十首默然心伏世間富貴應無分身後文章合有

名莫怪氣粗言語大新排十五卷詩成

湖上閒望

藤花浪拂紫茸條菰葉風翻綠剪刀閒弄水芳生楚
思時時合眼詠離騷

白氏文集卷第十六



Handwritten text or a small mark on the right edge of the page, possibly a page number or a reference mark.

